


土岐文庫
文庫17
W157
3



11-3E



Faint, illegible text arranged in vertical columns within a rectangular border on the left page. The text is too light to be read accurately but appears to be organized in a structured format, possibly a list or index.

Vertical red text stamp at the bottom right of the left page, containing characters such as '大正' (Taisho) and '年' (year).

文庫 17
W157
3



後村詩話新集卷一

陳拾遺

宋劉克莊

感遇詩云微月生西海幽陽始化昇圓光正東滿陰魄已朝
凝太極生天地三元更廢興至精諒斯在三五誰能徵又云
蘭若生春夏葍何青青幽獨空林色朱蕤冒紫莖遲遲白
日晚嫋嫋秋風生歲華盡搖落芳意竟何成又云蒼蒼丁零
塞今古緬荒途亭埃何摧兀暴角無全軀黃沙暮雨起白日
隱西隅漢甲三十萬曾以事匈奴但見沙場死誰憐塞上孤
又云樂羊爲魏將食子殉軍功骨肉且相薄他日安得忠吾
間中山相乃屬放麕翁孤獸猶不忍況以奉君終又云市人
矜巧智于道若童蒙傾奪相夸侈不知身所終曷見元冥子

後村詩話新集卷一

適園叢書



010185185686

後世言者一
觀世玉壺中杳然遺天地乘化人無窮又云吾觀龍變化乃
知至陽精石林何冥密幽洞無留行古之得仙道信與元化
并元感非象識誰能測淪冥世人拘莫見酣酒笑丹經崑崙
有瑤樹安得采其英又云白日毋不歸青陽時暮矣茫茫吾
何思林臥觀無始眾芳委時晦鷓鴣悲鳴耳鴻荒古已頽誰
識巢居子又云吾觀崑崙化日月淪洞冥精魄相交構天壤
以羅生仲尼推太極老聃貴窈冥西方金仙子崇議乃無明
空色皆寂滅業緣定何成名教信紛籍死生俱未停又云聖
人祕元命懼世亂其真如何嵩公輩諛諂誤時人先天誠爲
美階亂禍誰因長城備胡寇羸禍發其親赤精既迷漢子年
何救秦去去桃李花多言死如麻又云深居觀元化怫然事

朵頤羣動相啖食利害紛礙便便夸毘子榮耀更相持務
光讓天下商賈競刀錐已矣行采芝萬世同一時又云吾愛
鬼谷子青氣無垢氛囊括經世道遺身在白雲七雄方龍鬪
天下久無君浮榮不足貴導養晦時文舒可彌宇宙見之不
盈分豈徒山木壽空與麋鹿羣又云呦呦南山鹿離罟以媒
和招搖青桂樹幽蠹亦成科世情甘近習榮耀紛如何怨憎
未相復親愛生禍羅瑤臺傾巧笑玉杯殞雙蛾誰見孤城樹
青青成斧柯又云林居病時久水木澹孤清閒臥觀物化悠
悠念羣生青春始萌達朱火已滿盈殂落方自此感歎何時
平又云臨歧泣世道天命良悠悠昔日殷王子玉馬遂朝周
寶鼎淪伊穀瑤臺成故丘西山傷遺老東陵有故侯又云貴

人難得意賞愛在須臾莫以心如玉探他明月珠昔稱天桃子今爲春市徒鳴鴉悲東國麋鹿泣姑蘇誰見鷓夷子扁舟去五湖又云聖人已去久公道緬良難蚩蚩夸毘子堯禹以爲謾矯榮貴工功勢利迭相干燕王尊樂毅分國願同歡魯連讓齊爵遺組去邯鄲伊人信往矣感激爲誰權又云幽居觀大運悠悠念羣生終古代興沒豪聖莫能爭三季論周赧七雄滅秦嬴復聞赤精子提劍入咸京炎光旣無象晉魯復縱橫堯禹道已昧昏虐勢方行豈無當世雄天道與胡兵咄咄安可言時醉而未醒仲尼溺東夏伯陽遁西溟大運自古來旅人胡歡哉又云逶迤世已久骨鯁道斯窮豈無感激者時俗頽此風灌園何其鄙世道不相容皎皎於陵子嗟嗟張

良公又云聖人不利己憂濟在元元黃屋非堯意瑤臺安可論吾聞西方化清淨道彌尊奈何窮金玉雕刻以爲尊雲構山林盡瑤圃珠翠煩鬼功尙未可人力安能存夸愚適增累矜智道逾昏又云元天幽且默羣議曷啍啍聖人教猶在世運久凌遲一繩將繫何憂醉不能持去去行采芝勿爲塵所欺又云蜻蛉遊天下與世本無患飛飛未能止黃雀來相干穰侯富秦寵金石比交歡出入咸陽裏諸侯莫敢言寧知山東客激怒秦王布衣取丞相千載爲辛酸又云微霜知歲晏斧柯始青青況乃金天夕浩露沾羣英登山望宇宙白日已西溟雲漢方蕩瀟孤鱗安得寧又云翡翠巢南海雌雄珠樹林何如美人意驕愛比黃金殺身炎州裏委羽玉堂陰旖

旒光首飾葳蕤爛錦衾豈不在遐遠虞羅忽見尋多材信爲
累歎息此珍禽又云挈瓶者誰子妖服當青春三五明月滿
盈盈不自珍高堂委金玉微縷懸千鈞如何負公鼎被奪笑
時人又云元蟬號白露茲歲已蹉跎羣物從大化孤英將奈
何瑤臺有青鳥遠食玉山禾崑崙見元鳳豈復虞雲羅又云
荒哉穆天子好與白雲期宮女多怨曠層城閉蛾眉日耽瑤
臺樂豈傷桃李時青苔空萎絕白髮生羅帷又云朝發宜都
渚浩然思故鄉故鄉不可見路隔巫山陽巫山綵雲沒高
成微茫佇立望已久涕泣露衣裳豈茲越鄉感憶昔楚襄王
朝雲無處所荆國亦淪亡又云昔日章華宴荆王樂荒淫霓
旌翠羽蓋射兕雲夢林搗來高唐觀悵望雲陽岑雄圖今何

在黃雀空哀吟又云丁亥歲云暮西山事甲兵羸糧市邛道
荷戟爭羌城嚴冬陰風勁窮岫油雲生昏躋無晝夜羽檄復
相驚攀踞競萬仞崩危遠九冥籍籍峰壑裏哀哀冰雪行聖
人御宇宙聞道秦階平肉食謀何失葵藿緬縱橫又云可憐
瑤臺樹灼灼佳人姿碧華映朱實攀折青春時豈不甚光寵
榮君白玉墀但恨紅芳歇凋傷感所思又云竭來豪遊子勢
利禍之門如何蘭膏歎感激自生冤眾趨明所避時棄道遊
存雲泉旣已失羅網與誰論箕山有高節湘水有清源惟應
白鷗鳥可爲洗心言又云索居能幾日炎夏忽然衰陽彩皆
陰翳親友盡睽違登山望不見涕泣久漣漣宿夢感顏色若
與白雲期世中驕豪子驅逐正啞啞蜀山與楚水攜手在何

後世詩話卷一
時又云金鼎合神丹世人將見欺飛飛騎羊子胡乃在峨眉
變化固幽類芳菲能幾時疲疴苦淪世憂痾日浸淄眷然顧
幽褐白雲空涕洟又云朔風吹海樹蕭條邊已秋亭上誰家
子哀哀明月樓自言幽燕客結髮事遠遊赤丸殺公吏白刃
殺私讎避仇至海上被役此邊州故鄉三千里遼水復悠悠
每憤胡兵入常爲漢國羞何如七十載白首未封侯又云本
爲貴公子平生實愛才感時思報國拔劍起蒿萊西馳丁令
塞北上單于臺登山見千里懷古心悠哉誰言未忘禍磨沒
成塵埃又云浩然坐何暮吾蜀有峨眉念與楚狂子悠悠白
雲期時哉悲不會涕泣久漣沔夢登綏山穴南來巫江芝探
元觀奇化遺世從雲嶠婉變將永矣感悟不見之又云朝入

雲中郡北望單于臺胡秦何密邇沙朔氣雄哉籍籍天驕子
猖狂已復來塞垣無名將亭堠空崔嵬咄嗟吾何歎邊人塗
草萊又云仲尼探元化幽鴻順陽和大運自盈縮春秋遞乘
過盲颯忽號怒萬物相紛劇溟海皆震蕩孤鴻其如何
編詩自唐人有李杜泛浩浩韓柳摩蒼蒼之句余旣以四君
子冠篇首然以輩行歲月較之則陳拾遺在四君子之上感
遇之作雖朱文公命世大儒亦凜然起敬昔摘數聯今全錄
於此

李杜

子美墓誌云娶宏農楊氏司農少卿怡之女四十九而終子
宗武至死不克葬其子嗣業後四十餘年乃克葬於首陽山

後村詩話卷一
王
前長子宗文者傳記皆不言其所終豈失學遂無聞與如樹
雞柵之類必非精文選者

太白後序云娶許生一女二男女曰明月奴嫁而卒繼劉次
合魯生子曰頤黎終娶宗凡四娶又云攜駿馬美妾所適二
千石郊迎飲數斗世號李東山余記白子名伯禽今新舊唐
史皆不載新史載其二孫女嫁爲民妻進止有風範謂觀察
使范傳正言先祖志在青山葬東麓非其志傳正爲改葬青
山又欲使二女改妻士族辭以命也不願更嫁傳正復其夫
徭役頤黎豈伯禽之小字歟逸其事當攷白與宗十六詩云
晚娶宗序記爲宋
世傳退之有題子美墳七言一首末章有三賢所歸同一水
之句此篇出入平仄不數韻累三十六句其辭鄙淺無一字

是韓筆韓集李漢所編亦無此篇

元微之作子美墓誌及銘皆高古如云子美上薄風騷下該
沈宋言奪蘇李氣吞曹劉掩顏謝之孤高雜徐庾之流麗盡
古今之體制兼文人之所獨專說得出其評李杜謂太白壯
浪縱恣擺去拘束模寫物象及樂府歌詩誠亦差肩子美矣
至若鋪陳終始排比聲韻大或千言次數百詞氣豪邁屬對
律切李尙不能歷其藩翰況壺奧乎則抑揚太甚

國初盛稱二孫何之文苦不多見僅敘杜詩云公詩支爲六
家孟郊得其氣燄張籍得其簡麗姚合得其清雅賈島得其
奇僻杜牧僻能得其豪健陸龜蒙得其膽博此數語亦近似
但郊謂之得杜氣骨可也烏有所謂燄哉能詩非牧比不可

並稱龜蒙甚贍博亦道不著余謂善評杜詩無出半山吾觀少陵詩謂與元氣侔之篇萬世不易之論王逢源云雕鐫物象三千首照耀乾坤四百春雖面前語他人亦不能道

楊大年歐陽公皆不喜杜子美詩王介甫不喜太白詩殊不可曉介甫之說云白詩十句九句說婦人酒耳獨不思命高將軍脫鞬識郭汾陽於貧賤時比開元貴妃於飛燕豈說婦人酒者所能為耶晦翁亦云近時詩人何曾夢見太白腳後板

故人陳伯^儼 郎中讀北征詩戲語余曰子美善諱如云粉黛忽解苞狼籍畫眉閣雖妻女亦不怨余云公知其一爾別詩云清輝玉臂寒閨中之膚色玉耀可見又云何時依虛幌

雙照淚痕乾其篤于伉儷如此伯^儼大笑

白與裴長史書云蜀中友人吳指南死于洞庭之上白禪服慟哭若喪天倫炎月伏屍泣盡繼之以血權殯湖側自金陵歸數年遺骸猶在白雪泣持刃躬申洗削裹骨徒步負之而趨丐貨營葬於鄂城之東其自序如此史亦不書

史言明皇欲官太白為妃所沮余觀飛燕在昭陽之語不足深憾雪讒詩自序甚詳略云漢祖呂氏食其在旁秦皇太后毒亦媼荒時妃以祿山為兒史云宮中有醜聲而白肆言無忌如此他人於玉環事皆微婉其詞如云養在深閨人不識又云薛王沈醉壽王醒又云不從金輿惟壽王白獨昌言之可見剛稜嫉惡坡公疑其以此召怨力士因借此以報脫鞬

之辱豈飛燕之句能爲崇哉

李郭皆唐名將臨淮馭軍嚴士不敢仰視汾陽頗寬大故子美新安吏點兵詩云送行勿泣血僕射如父兄

岳陽樓云昔聞洞庭水今上岳陽樓吳楚東南坼乾坤日夜浮親朋無一字老病有孤舟戎馬關山北憑軒涕淚流岳陽樓賦詠多矣須推此篇獨步非孟浩然輩所及

千秋節云寶鏡羣臣得金吾萬國迴衢尊不重飲白首獨餘哀子美在天寶閒雖獻三賦未嘗一用不過扈駕入蜀暫爲諫官而追懷開元於十九年之後寶鏡羣臣得金吾萬國迴之句言羣臣皆賜鏡而金吾仗衛萬里還京獨嘗艱阻末云衢尊不重飲白首獨餘哀公於唐朝諸公中獨最疏遠而一

念不忘忠愛比陳希烈張垆張均兄弟窮富極貴賣唐賊臣罪不容誅矣

本朝詩僧道潛自號參寥太白有贈參寥子一篇云白鶴飛天書南荆訪高士五雲在峴山果得參寥子骭髀辭故園昂藏入君門天子分玉帛百官接話言長揖不受官拂衣歸林巒此一僧一道士皆號參寥以先後言則潛爲頂冒聊記之以發一笑

新安吏潼關吏石壕吏新婚別垂老別無家別諸篇其述男女怨曠室家離別父子夫婦不相保之意與東山采薇出車杖杜數詩相爲表裏唐自中葉以徭役調發爲常至於亡國肅代而後非復貞觀開元之唐矣新舊唐史不載者略見杜

詩

太白百憂萬憤二篇百憂上崔相者員也云台星再朗天綱重恢屈法伸恩棄瑕取才卒賴員力北歸萬憤投魏郎中不知魏何人乃儕之崔相之列此篇云樹榛拔桂囚鸞寵雞語甚新又言兄弟妻子離隔有一門骨肉散百草遭難不復相提攜之句魏必是一志義之士能恤人患難者當攷

八哀詩如張曲江云仙鶴下人間獨立霜毛整上君白玉堂倚君金華省如李北海云古人不可見前輩復誰繼又云碑板照四裔又云豐屋珊瑚鉤麟麒織成蜀紫騮隨劍几義取無虛歲又云獨步四十年風聽九皋唳子美惟於此二公尤尊敬如李臨淮云平生白羽扇零落蛟龍匣極悲壯又云青

蠅紛營營風雨秋一葉內省未入朝死淚終映睫其形容臨淮憂讒畏譏不敢入朝之意說得出餘人如鄭虔之非無可說但每篇多蕪詞累句或爲韻所拘殊欠條鬯不如飲中八仙之警策蓋八仙篇每人只三二句八哀詩或累押二三十韻以此知繁不如簡大手筆亦然

太白求白鵬詩云照影玉潭裏刷毛琪樹閒夜樓寒月靜朝步落花閒唐人詠白鵬者極少本朝歐梅皆有此作當更求鵬詩以補遺

醉筇丁十八云黃鶴高樓已槌碎黃鶴仙人無所依黃鶴上天訴玉帝卻放黃鶴江南歸神明太守再雕飾新圖粉壁還芳菲一州笑我爲狂客少年往往來相譏君平簾下誰家子

云是遼東丁令威作詩調我驚逸興白雲繞筆窗前飛待取
明朝酒醒罷與君爛熳尋春暉不知丁十八為何人敢與謫
仙挑戰豈非任棠之流乎

贈岑徵君云岑公相門子雅望歸安石奕世皆夔龍中台有
三壻雖登洛陽殿不屈巢由身余亦謝明主今稱偃仰臣登
高覽萬古思與廣成鄰西來一搖扇共拂元規塵此篇清拔
不書徵君姓名豈非與子美同為遺補者乎按京兆杜確序
岑參詩言參曾大父文本大父長倩伯父義皆至台輔則徵
君只是此人無可疑者但敘云參天寶三載進士高第歷官
至右補闕起居郎入為郎出為京西判官嘉州刺史不言其
嘗被徵召豈偶遺忘耶

別宗十六云我非東牀人令姊忝齊眉浪迹未出世空名動
京師適遭雲羅網翻作夜郎悲掘妻莫邪劍及此二龍隨慚
君湍波苦千里遠從之白帝曉猿斷黃牛過客遲遙瞻明月
峽西去益相思妻與團兄從至夜郎與集序終娶於宗之說
合注家或以宋為宗或以宗為宋但當以白詩為正

江陵送馬卿云天意高難問人情老易悲惠子云皇天無老
眼空谷滯斯人唐人送山人處士五言多矣此二聯劉隨州
鮑溶輩精思不能逮

小寒食舟中云春水船如天上坐老年花似霧中看此聯在
目前而古今人所未發

天育驃騎歌云伊昔太僕張景順監牧攻駒閱清峻遂令大

奴守天育天育監名大奴謂王毛仲別養驥子憐神駿當時四十萬匹馬
張生歎其材盡下故獨寫真傳世人見之座右久更新年多
物化空影形嗚呼健步無由騁如今豈無腰褭與驂騮時無
王良伯樂死即休又題韋偃馬云韋侯別我有所適知我憐
君畫無敵戲拈秃筆埽驂騮歛見麒麟出東壁一匹嚙草一
匹嘶坐看千里當霜蹶時危安得真致此與人同生亦同死
少陵馬詩多矣此二篇及曹霸丹青引尤老蒼一洗萬古
杜鵑行云寄巢生子不自啄羣鳥至今為哺雛雖同君臣有舊
禮骨肉滿眼身羈孤此篇以為車駕幸蜀六宮莫從百官竄
伏奔問行在者絕少又義鵑行云飄蕭覺素髮凜欲衝儒冠
又云永激壯士肝似謂當時有權位而不能救人之急脫人

於難者

前出塞云君已富土境開邊一何多棄絕父母恩吞聲行負
戈又云生死向前去不勞吏怒嗔路逢相識人附書與六親
哀哉兩決絕不復同苦辛又言軍中異苦樂主將寧盡聞又
云殺人亦有限立國亦有疆苟能制侵陵豈在多殺傷又云
驅馬天雨雪軍行入高山逕危抱寒石指落層冰間已去漢
月遠何能築城還後出塞云千金買馬鞍百金裝刀頭又云
漁陽豪俠地擊鼓吹笙竽雲帆轉遼海粳稻來東吳越羅與
楚練照耀輿臺軀主將位益崇氣驕凌上都邊人不敢議議
者死通衢又云中夜閒道歸故里俱空村惡名幸脫免窮老
無兒孫謂逃祿山之難者此十四篇筆力與文選中擬古十九首並

驅

太白擬古十三首感興六首文義或不相屬與集中五言古詩絕不類豈貫休之徒效嘖歟

望鸚鵡洲云魏帝營八極蟻觀一禰衡黃祖斗筲人殺之受惡名鸞鵲啄孤鳳千春傷我情至今芳草上蘭蕙不忍生此篇有無窮之悲

永王東巡歌內一絕云三川北虜亂如麻四海南奔似永嘉但用東山謝安石爲君談笑靖胡沙按永王璘客如孔巢父亦在其間白其一耳此篇所謂謝安石不知屬誰可見自負不淺然十篇只目王爲帝子受命東巡與王衍阮籍勸進事不同

姑熟十詠前輩疑非白作信然

越中覽古云越王句踐破吳歸義士還家盡錦衣宮女如花滿春殿只今惟有鷓鴣飛蘇臺覽古云舊苑荒臺楊柳新菱歌清唱不勝春只今惟有西江月曾照吳王宮裏人二首可入七言絕句

上皇西巡歌云柳色未饒秦地綠花光不減上陽紅又云地轉錦江成渭水天迴玉壘作長安末云少帝長安開紫極雙懸日月照乾坤時上皇播遷於蜀非欲留蜀者今盛稱錦江玉壘無異渭水長安又謂雙懸日月照乾坤若爲少帝諱不力請回鑾者此所以上皇有乞我劍南一道之歎歟

秋浦十五首云秋浦長似秋蕭條使人愁遙傳一掬淚爲我

達揚州又云秋浦錦駝鳥人間天上稀山雞羞綠水不敢照
毛衣又云山川如剡縣風日似長沙又云兩鬢入秋浦一朝
颯已衰髮聲催白髮長短盡成絲雖五言然多佳句
玉壺吟云西施宜笑復宜嚬醜女效之徒害身君王雖愛蛾
眉好無奈宮中妬殺人則妃嘗沮白信而有證
笑歌行悲歌行太淺易欠豪放前輩疑非白作

韋偃雙松圖云天下幾人畫古松畢宏已老韋偃少絕筆長
風起纖末滿堂動色嗟神妙兩株慘裂苔蘚皮屈鐵交錯迴
高枝白摧朽骨龍虎死黑入太陰雷雨垂松根胡僧憩寂寞
龐眉皓首無住著偏袒右臂露雙腳葉裏松子僧前落韋侯
韋侯數相見我有一匹好素絹重之不減錦繡段今已拂拭

光凌亂請公放筆爲直幹韋畢李之畫今皆不存賴詩以傳
內白摧朽骨龍虎死黑入太陰雷雨垂天造險語盡古松奇
怪之狀李尊師松障歌云更覺良工心獨苦前輩多稱此句
張舍人遺禱段云開緘風濤湧中有掉尾鯨空堂魑魅走高
枕形神清領客珍重意願非我公卿服飾定尊卑大哉萬古
程今我一賤老短褐更無營煌煌珠宮物寢處禍所嬰昔聞
黃金多坐見悔吝生奈何田舍翁受此厚貺情錦鯨卷還客
始覺心和平可見子美一介不取之意

病柏云有柏生崇岡童童狀車蓋偃蹇龍虎姿生當風雲會
豈知千年根中路顏色壞出非不見地蟠據亦高大歲寒忽
無憑日夜柯葉改丹鳳領九雛哀鳴翔其外鷗鷺志意滿養

予穿穴內客從何處來佇立久呼怪唐自闔者力士輔國士
良朝恩弄權怙寵元勳老將如汾陽臨淮西平北平皆凜凜
不自安此篇詞不迫切而意獨至

病橘之作傷微物失所至於困瘁內云嘗聞蓬萊殿羅列瀟
湘姿此物歲不稔玉食失光輝寇盜尙憑陵當君減膳時汝
病是天意吾諗罪有司言此果昔時奉玉食今以病見廢咎
有司失包貢反不若南海荔支歲馳至長安爾

枯樛篇云蜀門多樛櫚高者十八九其皮剝盡雖眾亦易
朽交橫集斧斤凋長先蒲柳傷時苦軍乏一物官盡取嗟爾
江漢人生成亦何有有同枯樛木使我沈歎久死者卽已休
生者何自守注云蜀人取樛皮以充用如邊吏誅求江漢民

力以供軍必至于剝盡而後已

枯樛篇云榎樛枯嶢嶢鄉黨皆莫記不知幾百歲慘慘無生
意上枝摩皇天下根蟠厚地巨圍雷霆折萬孔蟲蟻萃白鶴
遂不來天雞爲怨思猶含棟梁具無復霄漢志良工古昔少
識者出涕淚種榆水中央成長何容易截成金露盤裊裊不
自畏以榆本非承露之器是以輕承重豈不裊裊可畏乎注
言大材不用而柔脆嵬瑣之材反居重任

東山吟云攜妓東山去悵然悲謝安我妓今朝如花月他妓
古墳荒草寒白雞夢夜三百歲酒酒澆君同所歡酣來自作
青海舞秋風吹落紫綺冠彼亦一時此亦一時浩浩洪流高
詠何必奇晉至今二千歲皆以爲謝公爲風流之宗雖半山

後村詩話卷一
西
嘔強金陵諸詩篇篇起敬惟謫仙平視謝公與之對壘無所
推讓時人號爲李東山固以李配謝矣

草書歌云墨池飛出北溟魚筆鋒掃盡中山兔八月九月天
氣涼酒徒詞客滿高堂須臾掃盡數千張飄風驟雨驚颯颯
落花飛雪何茫茫起來向壁不停手一行數字大如斗恍恍
如聞神鬼驚時時但見龍蛇走左盤右蹙如驚電狀同楚漢
相攻戰王逸少張伯英古來幾許浪得名張顛老死不足數
我師此技不師古古來萬事貴天生何必公孫大娘渾脫舞
自有草書以來未有能形容此妙者楚漢數語真可以破鬼
膽

趙遊太山云清曉騎白鹿直上天門山山際逢羽人方瞳好

容顏捫蘿欲就語卻掩青雲關遺我鳥迹書飄然落巖間其
字乃上古讀之了不間感此三歎息從師方未還又云平明
登日觀舉手開雲關精神四飛揚如出天地間黃門從西來
窈窕入遠山憑巖覽八極目盡長空閒偶然值青童綠髮雙
雲鬢笑我晚學仙蹉跎凋朱顏躊躇忽不見浩蕩難追攀又
云舉手弄清淺誤攀織女機明晨坐相失但見五雲飛此六
首皆仙人語非學仙人語亦非任常輩所敢擬倫丁十八輩
所敢挑戰者

嘲魯儒云魯叟談五經白髮死章句問以經濟策茫如墮煙
霧足著遠遊履首戴方頂巾緩步從直道未行先起塵秦家
丞相府不重褒衣人君非叔孫通與我本殊倫時事且未達

歸耕汶水濱此篇幾於以儒爲戲然秦家丞相府不重褒衣人非謫仙不能語

過彭蠡云謝公入彭蠡因此遊松門余方窺石鏡兼得窮江源而欲繼風雅豈云清心魂雲海方助興波濤何足論水碧或可采金膏祕莫言余將振衣去羽化出囂煩此篇有陶謝意

與道者談玄云茫茫大夢中惟我獨先覺騰轉風火來假合作容貌滅除昏疑盡領略入精要朗晤前後際始知金仙妙公詩多說仙惟此篇兼說金仙

題辭少保畫鶴云辭公十一鶴皆寫青田真低昂各有意磊落如長人佳此志氣遠豈惟粉墨新赤霄有真骨豈飲洿池

津冥冥任所往脫略誰能馴又角鷹歌云楚公畫鷹鷹戴角殺氣森森到幽朔觀者貪愁掣臂飛畫師不是無心學此鷹寫真在左縣卻嗟真骨遂虛傳梁間燕雀休驚怕亦未搏空上九天此鶴此鷹賴詩以傳則詩壽於畫矣赤霄有真骨豈飲洿池津之句羽類無敢當者時人不識角鷹本色而以左縣畫本爲真雖梁間燕雀亦驚怕故卒章有亦未搏空上九天之句

前打魚篇於眾魚中獨云赤鯉騰出如有神又云鯨魚肥美如第一而徐州秃尾漢陰槎頭皆不數又云旣飽懼娛亦蕭瑟末云君不見朝來割素髻尺波濤永相失後打魚云小魚脫漏不可計半死半生猶戢戢大魚傷損皆垂頭屈強沙

泥有時立東津觀魚已再來主人龍膾還傾杯日暮蛟龍改
窟穴山根鱸鮪隨雲雷干戈兵爭鬪未已鳳凰麒麟安在哉
吾徒胡爲縱此樂暴殄天物聖所哀兩篇末句皆不忍暴殄
之意公詩深得風人之義
催宗文樹雞柵篇押十八韻頗奇澀欠瀏亮然宗文能領會
非若阿買之不識字

摘蒼耳篇江上秋已分林中瘴猶劇哇丁告勞苦無以供日
夕卷耳況療風童兒且時摘侵星驅之去爛熳任遠適放筐
亭午際洗剝相蒙羸登牀半生熟下筴還少益亂世誅求急
黎民糠粃窄飽食復何心荒哉膏梁客富家廚肉臭戰地骸
骨白公雖羈旅奔竄一飲啄間不忍自求溫飽侵星驅出摘

采者不知是哇丁或蒼頭詩但云童兒往往是宗文兄弟爾
負薪行言夔州俗坐男而女立有四五十無夫家者末云
若道巫山女麤醜何得此有昭君邨最能行云峽中丈夫絕
輕死少在公門多在水小兒學文止論語大兒結束隨商旅
此鄉之人氣量窄誤競南風疏北客若道士無英俊材何得
山有屈原宅始言夔峽二邦之陋末以昭君屈原勉勵其土
俗公詩篇篇忠厚如此

舞劍器行世所膾炙絕妙好詞也內云先帝侍女八千人公
孫劍器稱第一五十年閒似反掌風塵瀕洞昏王室梨園弟
子散如煙女樂餘姿映寒日金粟堆南木已拱瞿塘石城草
蕭瑟玳筵急管曲復終樂極哀來月東出餘謂此篇與琵琶

行一如壯士軒昂赴敵場一如兒女恩怨相爾汝杜有建安
黃初氣骨白未脫長慶體耳

代內云寶刀截流水無有斷絕時妾意逐君行纏綿亦如之
又云妾似井底桃開花向誰笑君如天上月不肯一迴照又
云窺鏡不自識別多憔悴深安得秦吉了爲人道寸心潯陽
寄內云多君同蔡琰流淚請曹公又贈內云三百六十日日
日醉如泥雖爲李白婦何異太常妻世稱太白名姬駿馬若
放蕩者然於倫紀尤厚別篇云妻家三作相爲許氏潯陽寄
內則爲宗氏作矣終始篤於伉儷如此宗氏垂淚訟冤之事
更不書

李杜一生流落不偶然交遊皆賢相名卿杜於房瑄李於張

鎬見於賦詠意氣投合情誼慷慨二公皆爲唐佐命勲在帝
室然終不能攀致李杜一羈旅雲安潼谷拾橡栗而食一放
逐夜郎秋浦聞猿聲而哭豈兩賢文章光燄取數于天者已
多折磨而然歟

攝監察御史崔成甫贈李十二云我是瀟湘放逐臣君辭明
主漢江濱天外常求太白老金陵捉得酒仙人白酬崔侍御
云嚴陵不從萬乘遊歸臥空山釣碧流自是客星辭帝座元
非太白醉揚州成甫亦必豪傑之士更相稱譽如此答友人
贈烏紗帽云領得烏紗帽全勝白接籬山人不照鏡稚子道
相宜山中答俗人云問余何事棲碧山笑而不答心自閒桃
花流水窈然去別有天地非人間答湖州迦葉司馬問白是

何人云青蓮居士謫仙人酒肆藏名三十春湖州司馬何須
問金粟如來是後身此三篇可入五七言絕句
長門怨云天迴北斗挂西樓金屋無人螢火流月光欲到長
門殿別作深深一段愁此篇雖只二十八字然婉而成章哀
而不怨勝長門賦

扶風豪士歌云原常春陵六國時開心露膽君所知堂中各
有三千士明日報恩知是誰四公子之客多雞鳴狗吠之徒
豈能一一報恩哉羅隱云思量郭隗平生事不殉昭王是負
心郭隗能致樂毅劇辛以報燕昭朱亥輩恐未能辦此
訪范居士失道落蒼耳中見范置酒摘蒼耳云他筵不下筯
此席忘朝飢果茹之品多矣蒼耳微物而李杜皆形之賦詠

物之遭遇亦有時耶

題元丹正五言三篇云松風清襟袖石潭洗心耳又云忽遺
蒼生望獨與洪巖羣元丹正不知何人而白稱之如此以丹
正二字觀之恐是天台雁蕩人然山居在潁陽不可曉當考
謫仙詩如古風六十三首及樂府諸篇又古律詩舉世誦習
者不錄今所采錄或一篇或三數句各有意義覽者詳之

後村詩話新集卷一

此一篇專為杜陵補遺

宋劉克莊

後村詩話新集卷二

宋劉克莊

此一篇專為杜陵補遺

陳拾遺故宅詩至比之郭元振唐人敬重拾遺如此文上人
上方云庭前猛虎臥遂得文公廬吾師雨花外不下十年餘
長者自布金禪龕只冥如又曰王侯與螻蟻同盡隨瓦壚願
聞第一義回向心地初此僧不知何人必深於內典者
莫相疑行男兒生無所成頭皓白牙齒欲落真可惜憶昨獻
賦蓬萊宮自怪一日聲輝赫集賢學士如堵牆觀我落筆中
書堂往時文采動人主此日飢寒趨路旁晚將末契託年少
當面輸心背面笑寄謝悠悠世上兒不爭好惡莫相疑他人
於當面輸心背面笑之下文必有餘怨公卒章優游閒暇了

無忿憂

閩州絕句云殿前兵馬雖驍雄縱暴略與羌渾同聞道殺人漢水上婦女多在官軍中當時殿前兵無紀律如此別篇云二十一家同入蜀惟殘一人出駱谷必是子美自謂
柎木爲風雨所拔云倚江柎樹草堂前故老相傳二百年誅茆卜居總爲此五月彷彿聞寒蟬東南飄風動地至江翻石走流雲氣滄波老樹性所愛浦上童童一青蓋虎倒龍顛委榛棘淚痕血點垂胸臆我有新詩何處吟草堂自此無顏色茅屋爲秋風所破云八月秋高風怒號卷我屋上三重茆南村羣童欺我老無力忍能對面爲盜賊公然抱茆入竹去唇焦口燥呼不得秋天漠漠向昏黑布衾多年冷似鐵嬌兒惡

臥榻裏裂牀頭屋漏無乾處兩腳如麻未斷絕安得廣廈千萬間大庇天下寒士俱歡顏風雨不動安如山嗚呼何時眼前突兀見此屋吾廬獨破受凍死亦足谿柎茆屋爲風所拔不以草堂茆屋飄飄爲憂方有惜古木庇寒士之意其迂闊如此

天邊行云九度將書向洛陽十年骨肉無消息大麥行云大麥乾枯小麥黃婦女行泣夫走藏問誰腰鑱胡與羌苦戰行云苦戰身死馬將軍云是伏波之子孫注馬璘也去秋行云去秋涪江木落時臂槍走馬誰家兒到今不知白骨處部曲有去皆無歸戰場冤魂每夜哭空令野營猛士悲此數篇皆可補史之缺文但遂州白骨不歸失其姓名當攷

草堂云弧矢暗江海難爲遊五湖不忍竟舍此復來雜榛蕪
天下尚未寧健兒勝腐儒此篇歎還吳未可重值浣花榛蕪
四松萬竹無恙鄰里大官賓客喜歸可見隨寓而安之意於
時天下未寧固有健兒勝腐儒之句卒章云飄搖風塵際何
地置老夫飲啄媿殘生食薇不敢餘其語意雍容閒雅有雅
人之深致

牽牛織女篇云牽牛出河西織女處其東萬古永相望七夕
誰見同神光竟難俟此事終朦朧颯然精靈合何必秋遂通
前人詠牛女者所未及

壯遊詩押五十六韻在五言古風中尤多悲壯語如云往者
十四五出游翰墨場斯文崔魏徒以我似班揚又云脫略小

兒輩結交皆老蒼東下姑蘇臺已具浮海航到今有遺恨不
得窮扶桑又云上感九廟焚下憫萬民瘡小臣議論絕老病
客殊方雖荆卿之歌雍門之琴高漸離之筑音調節奏不如
是之跌宕豪放也

二角鷹篇云惡鳥飛飛啄金屋安得爾輩空其羣驅出六合
梟鸞分子美前有左繇畫角鷹詩此二鷹乃真本非左繇畫
本也

寫懷篇云禍首燧人氏厲階董狐筆君看鐙燭張轉使飛蛾
密注云燧人火化而嗜欲之心生董狐直筆而是非之端起
其說甚新

可歎篇云天上浮雲如白衣斯須改變如蒼狗古往今來共

後村詩話卷二
一時人生萬事無不有丈夫正色動引經
鄴城客子王季友貧窮老瘦家賣屐好事就之爲攜酒豫章太守高帝孫引爲賓客敬頗久聞道三年未曾語小心恐懼閉其口太守得之更不疑人生反覆看亦醜時危可仗真豪俊二人得置君側否詩言王季友誠賢士但爲太守客當有獄市薤水之規今年恐懼不出口何也說且如此使其在君側其能補袞職之闕哉客以默求容主以默求賢恐非篤論然子美終以義和禹旦事業望王季殊不可曉末云吾輩碌碌飽飯行風后力牧長回首乃子美以風后力牧自期抱負尤不淺矣醉爲馬墜云騎馬忽憶少年時散蹶迸落瞿塘石白帝城門雲水外低身直下八千尺向來皓首驚萬人自倚紅顏能騎

射不虞一蹶終損傷人生快意多所辱朋知來問覲我顏仗藜強起依童僕語盡還成開口笑提攜別埽清谿曲共指西日不相貸喧呼且覆杯中滌此篇可見壯老健衰之異末云何必走馬來爲問君不見稽康養生被殺戮南華云魯有單豹者巖居水飲七十有童孺之色不幸遇餓虎殺而食之有張毅者高門懸簿無不走也四十而有內熱之病以死豹養其內而虎食其外毅養其外而病攻其內乃公卒章之意遣懷篇云梁孝王都邑之盛及追懷與高適李白同登吹臺末有撫孤之句公飄飄一羈旅而葛屐練裙之念如此高李豈無厚祿故人聞之得無媿乎

大覺蘭若云一老猶鳴日暮鐘諸僧尙乞齋時飯可見寺小

僧貧之狀

折檻行云嗚呼房魏不復見秦王學士時難羨千載少似朱雲人至今折檻空嶙峋婁公不語宋公語尙憶先皇容直臣前思房魏次援朱雲後憶婁宋末云尙憶先皇容直臣此必子美追懷諫省時論事不合傷今思古而作

朱鳳行云君不見瀟湘之側衡山高山巔朱鳳聲嗷嗷側身長顧求其羣翅垂口噤心甚勞下憫百鳥在羅網黃雀最小猶難逃願分竹實及螻蟻盡使鷓鴣相怒號衡嶽有朱鳥峰此篇言朱鳥孤立無助棲託雖高不忍自求飽必欲百鳥如黃雀之類在羅網者皆分竹實以及之不暇計鷓鴣輩怒號矣

遣遇篇云石間采蕨女鬻菜輸官曹丈夫死百役暮返空村號聞見事略同剝及錐刀貴人豈不仁視爾如莠蒿夫死于役僅在女婦采蕨鬻菜以輸官天民之窮甚矣而官吏剝尤甚于錐刀此不獨指里胥亭長輩內自租庸使外自觀察使不得受其責故有貴人豈不仁視汝如莠蒿之句錄之以告其大位者

望嶽云南嶽配朱鳥秩禮自百王歛吸領地靈鴻洞半炎方邦家閱祀典在德惟馨香巡守何寂寥有虞今則亡祝融五峰尊峰峰次低昂紫蓋獨不朝爭長屹相望恭聞魏夫人羣仙夾翱翔望嶽之作多矣余行役過焉款靈瑣坐悅亭宿勝業寺累日嶽令與山中人謂余向慕道者將以味爽登絕頂

夕忽大雪余猶攀援而上望上封咫尺雪泥沒膝不可行然耳目之所覩記公詩真此山圖經也

謁玄元廟次昭陵二詩鉅麗駿壯爲千古五言律詩典則其歸美開基責望守成傷今思古無限忠愛之情

與韋左丞五言二篇當以古風爲勝左丞名濟又與韋左相律詩二十韻頗稱其相業此韋公名見素與張卿二十韻張卿名垧說子均弟兄貴盛遭漁陽之變合家殉難未足以報唐家今相率北面而賊垧帝堦也故明皇欲致之死汔全要領可謂失刑

寄高書記云歎息高生老新詩日又多美名人不及佳句法如何主將收才子崆峒足凱歌聞君已朱紱且得慰蹉跎憶

李白云不見李生久佯狂真可哀世人皆欲殺吾意獨憐才敏捷詩千首飄零酒一杯匡山讀書處頭白好歸來此二篇非高李不敢當非子美不能道

遊何將軍山林前首後半如云鮮鯽銀絲膾香芹碧澗羹又云萬里戎王子何年別月支漢使徒空到神農竟不知注云何將軍嘗征西域禽其王子歸傳其地花草數種又云花妥鶯梢蝶谿喧懶趁魚又云手自移蒲柳家才足稻梁何將軍舊注莫詳其人公詩有將軍不好武稚子總能文之句必勳貴中之好事者

遣興云驥子好男兒前年學語時問知人客姓誦得老夫詩世亂憐渠小家貧仰母慈鹿門移不遂雁足繫難期天地軍

麾滿山河戰角悲儻歸免相失見日敢辭遲驥子宗武小名公稱之如此公以其知客姓誦翁詩為喜又別篇云驥子春猶隔又云驥子最憐渠鍾情幼子如此而無一字及熊兒故余疑宗文失學

憶弟云喪亂同吾弟飢寒傍濟州人稀書不到兵在見何由又云百戰今誰在三年望汝歸又元日寄妹云近聞韋氏妹迎在漢鍾離春城回北斗郢樹發南枝不見朝正使嘍痕滿面垂公流落顛沛而一念不忘弟妹內云百戰今誰在三年望汝歸又云不見朝正使嘍痕滿面垂讀之感慨不但隆友愛而厚倫紀其厭離亂而思昇平以不見朝正使為恨言四方表章未達行在恐未有見妹之期耳

聞官軍臨賊篇二十韻多佳句如云秦山當警蹕漢苑入旌旄路失羊腸險雲橫雉尾高可見崎嶇巴蜀播遷梁益乘輿危迫之狀元帥歸龍種司空握豹韜注云廣平王為元帥郭汾陽副之前軍蘇武節左將呂虔刀其敘時事甚悲壯老健末云家家賣釵釧只待獻香醪寧賣釵釧以易香醪可見時人厭亂之極

贈嚴閣老云客禮容疏放官曹可接聯新詩句句好應任老夫傳嚴武雖跌蕩不羈然能客杜陵亦豪傑之士其詩往往附見杜集所謂句句好之評亦非過情之譽

送郭中丞云箭入昭陽殿笳吟細柳營內人紅袖泣王子白衣行詳此二聯必是述代宗幸陝之事

春宿左省云不侵聽金鑰因風想玉珂明朝有封事數問夜
如何岑參寄在省杜拾遺篇云聯步趨丹陛分曹限紫薇曉
隨天仗入莫惹御香歸白髮悲花落青雲羨鳥飛聖朝無闕
事自覺諫書稀岑杜同在諫省兩宮蒙塵時事可言者多矣
杜云明朝有封事數問夜如何岑云聖朝無闕事自覺諫書
稀岑有媿於杜多矣

秦州五言二十首內云州圖領同谷驛道出流沙降虜兼千
帳居人有萬家馬驕珠汗落胡舞白蹏斜古注白蹏胡名又
云鼓角緣邊郡川原欲夜時萬方聲一槩吾道竟何之又云
傳道東柯谷深藏數十家瘦地翻宜粟陽坡可種瓜又云萬
古仇池穴潛通小有天何時一茆屋送老白雲邊唐人遊邊

之作數十篇中間有三數篇一篇中間有一二聯可采若此
二十篇山川城郭之異土地風氣所宜開卷一覽盡在是矣
綱山送蘄帥云杜陵詩卷是圖經豈不信然聽角篇云萬方
聲一槩吾道竟何之聽角者多矣孰知此言之悲哉

示姪佐云嗣宗諸子姪早覺仲容賢舊注佐草堂在東柯谷
又三首內云白露黃梁熟分張素有期又云甚聞霜薤白重
惠意如何佐別業有黃梁又有霜薤分遺尊老其生理必小
康者

阮隱居致薤云盈筐承露薤不待致書求束比青芻色圓齊
玉筍頭衰年鬪鬪冷味煖腹無憂公轉側兵火閒飢寒檻縲
以詩攷之如薇如蕨如薤如筍如萑如蒼耳如萑皆入賦

詠真成一菜肚老人矣然公于菜中尤重薤有味煨腹無憂之句非嗜生冷者貴人日費萬錢或一生食萬羊子美晚途以耒陽令饋白酒牛肉暴卒豈若常蔬茹乎

客至云舍南舍北皆春水但見羣鷗日日來花徑不曾緣客掃蓬門今始爲君開盤殮市遠無兼味樽酒家貧只舊醅肯與鄰翁相對飲隔籬呼取盡餘杯此篇若戲效元白體者嚴武答杜二云臥向巴山月落時兩鄉千里夢相思可但步兵偏愛酒也知光祿最能詩江頭赤葉風愁客籬外黃花菊對誰歧馬望君飛一度冷援秋雁不勝悲嚴公詩亦佳豈近朱者赤耶杜有別嚴公五言云江村獨歸去寂寞養殘生可見子美潔於去就之際

懷舊云地下蘇司業情親獨有君那因喪亂後便有死生分老罷知明鏡悲來望白雲自從失詞伯不復更論文源明得卒章十字可以不朽矣

題玄武禪師屋壁云錫飛常近鶴杯渡不驚鷗玄武師未詳贈李白云豈無青精飯使我顏色好苦乏大藥資山林跡如埽李侯金閨彥脫身事幽討亦有梁宋遊相期拾瑤草公與岑參高適詩皆人情世法與謫仙倡和皆世外一種說話別房太尉墓云對碁陪謝傅把劍覓徐君用事極精切自聞赴蜀云棧懸斜避石橋斷卻尋谿山館云山鬼吹鐙滅廚人語夜闌蜀道荒僻如此

呈嚴公云胡爲來幕下止合在舟中又云老妻愛坐痺幼女

問頭風又云寬容存性拙翦拂念途窮又云曉入朱扉啟昏歸畫角終此篇曲盡幕府賓主情誼

春日江村云赤管隨王命銀章付老翁豈知牙齒落名在薦賢中注漢官儀丞郎月給赤管大筆一雙公時起部參謀服

緋故其詞如此卒章未免有周南留滯之歎然微而婉江上澶水云爲人性癖耽佳句語不驚人死不休焉得思如陶謝手令渠述作與同遊前兩句自負不淺卒章乃推尊陶謝可見前哲服善不爭名之意

寄杜位云逐客雖皆萬里去知君已是十年流玉壘題書心緒亂何時更得曲江遊此篇言位近聞寬法離新州注云位京中宅近西樓新州今屬廣東去京師遠卒章思與位復遊

曲江則非京師之新州矣當詳攷

登高云無邊落木蕭蕭下不盡長江滾滾來萬里悲秋長作客百年多病獨登臺此二聯不用故事自然高妙在樊川齊山九日七言之上

十二月一日雲安縣云一聲何處送書雁百丈誰家上瀨船又云負鹽出井此谿女打鼓發船何郡郎此二聯縣圖也

哭鄭司戶蘇少監云豪傑誰人在文章埽地無此篇二十韻錄一聯於此

聞河北節度入朝口號云喧喧道路多謠謠河北將軍盡入朝始是乾坤王室正卻教江漢客魂銷北道諸公無表來茫然世事遣人猜又云燕趙休矜出佳麗宮闈不擬選才人讀

後不言新集卷二
杜集至三十卷多亂離憤嫉跋扈之作此口號十二篇以河
北節度將人朝爲善以北道無表爲猜欲漁陽突騎邯鄲兒之
歸闕欲主上之如周宣漢武欲諸公爲孝子忠臣真一飯不
忘君者天寶禍亂自燕趙始今安史已無噍類燕趙佳麗可
開選色之場矣子美方有宮闈不擬選才人之句所謂舉筆
不忘規諫者耶

終明府水樓云絕壁過雲開錦繡疏松隔水奏笙簧此聯未
經人道

別李八祕書云反氣凌行在妖星下直廬又云不才同補袞
奉詔許牽裾又云御鞍金腰褭宮硯玉蟾蜍此篇三十韻敘
舊頗詳祕書不書名必是與公同扈從入蜀者觀不才同補

袞奉詔許牽裾之句似與公同諫省金腰褭玉蟾蜍近臣方
有此賜史失其名當攷

孤雁云孤雁不飲啄飛鳴聲念羣誰憐一片影相失萬重雲
望盡似猶見哀多如更聞野鷗無意緒鳴噪自紛紛讀此篇
便見得鮑當輩止是小家數

吾宗篇云吾宗老孫子質樸古人風耕鑿安時論衣冠與世
同昔溫公約康節服深衣答云某今人應服今衣溫公不能
強

谿上云塞俗人無井山田飯有沙灤西土風

八月十六夜云河漢近人流絕佳

秋興云聞道長安似弈碁百年世事不勝悲王侯第宅皆新

主文武衣冠異昔時直北關山金鼓振征西車駕羽書遲魚
龍寂寞秋江冷故國平居有所思公詩序亂離多百韻或五
韻或三十韻惟此篇最簡而切也

社日云今日江南老他時渭北童又云鴛鴦迴金闕誰憐病
峽中羈旅懷故鄉老大憶髻年人之至情也公生長韋杜老
逢秋日百官朝天公獨臥病峽中情見乎詞如此

詠懷古迹內先主孔明廟云古廟松杉巢水鶴歲時伏臘走
村翁武侯祠屋長鄰近一體君臣祭祀同又云萬古雲霄一
羽毛又云伯仲之間見伊呂臥龍公沒已千載而有志世道
者皆以三代之佐許之如云萬古雲霄一羽毛如儕之伊呂
伯仲間而以蕭曹爲不足道此論皆自子美發之考亭南軒

近世大儒不能廢也昭君村云畫圖省識春風面環佩空歸
月夜魂亦佳句

諸將篇云獨使至尊憂社稷諸君何以答昇平其責望諸將
深矣此篇謂張仁愿築三城本欲埽平吐蕃豈知乃用以救
朔方言九節度之敗

宗武生日云詩是吾家事又云覓句新知律乃翁稱之如此
而宗武詩無一字存者不若蘇叔黨有集行世

有感云諸侯春不貢使者日相望又云不過行儉德盜賊本
王臣又云領郡輒無色之官皆有詞願聞哀痛詔端拱問瘡
痍此三數聯略見當日時事使者相望而不貢自若必是內
租庸外觀察使符牒督賦急于星火領郡之官者皆憚行歟

後水言詩卷二
至於欲以儉德化盜賊爲王臣又欲下哀痛詔以問瘡痍唐人惟元結陽城有此意公於春陵行至比之華星秋月不刊之言也

東屯云築場憐穴蟻拾穗許邨童可見民胞物與之意

柳司馬至云有使歸三峽相過問兩京函關猶出將渭水更屯兵設備邯鄲道和親邏沙城幽燕惟鳥度商洛少人行公去國萬里逢人輒問兩京此數聯大歷閒事

元日示宗武云汝歸吾手戰吾笑汝身長前有明年共我長之語此又云吾笑汝身長見愛子長成而忽憶江東弟不見而悲其慈愛如此

放船出峽四十韻按公天寶十五載入蜀凡十三年羈旅非

一處而在夔最久至大歷三年始出峽之巴陵又二年卒於耒陽蜀中諸詩惟夔最多四十韻反覆曲折若不忍去雲安者

贈起居田舍人澄詩云舍人退食收封事宮女開函近御筵唐以舍人給事中司匭事又云宮中開函以所投封事奏御又云晴窗點檢白雲篇注云謂武帝秋風詞也

張垆雖爲詞臣恩澤侯耳今有黃麻似六經之句未之敢聞此篇押十六韻敘垆富貴及交遊之情若甚親密然卒章若自拔于疏外無附麗之意與別韋左丞詩云常擬報一飯况懷辭大臣若甚德韋公者然末句白鷗沒浩蕩萬里誰能馴公自植立每如此

哀王孫云長安城頭頭白烏夜飛延秋門上呼又向人家啄
大屋屋底達官走避胡金鞭斷折九馬死骨肉不待同馳驅
腰下寶玦青珊瑚可憐王孫泣路隅問之不肯道姓名但道
困苦乞爲奴高帝子孫盡隆準龍種自與常人殊亂世惟富
貴尤難全

不意青草湖扁舟落吾手中原消息斷黃屋今安否去蜀之
吳楚身與妻子弟妹知逃生之所而以中原消息斷黃屋安
否爲憂此山谷所以有長使詩人拜畫圖煎膠續絃千古無
之歎

後村詩話新集卷二

後村詩話新集卷三

宋劉克莊

孟浩然詩如微雲淡河漢疏雨滴梧桐之句館閣諸彥歎服
而集中不收豈逸其全篇乎奇衣曲云畏瘦宜傷窄防寒更
厚裝又魚行潭樹下猿挂島蘿閒警語不一老杜少所推服
獨稱其句句堪傳集中每以孟先生目之

韋莊蘇州絕句云紫閣西邊第幾峰茆齋夜雪虎行蹤遙看
黛色知何處欲出山門尋暮鐘五言云馬卿猶有壁漁父自
無家想子今何處扁舟隱荻花溫泉行出身天寶今幾年頑
鈍如鎚命如紙作官不了卻歸來還是杜陵一男子北風慘
慘投溫泉忽憶先皇遊幸年蒙恩每浴華池水扈獵不蹂涓
北田一朝鑄鼎降龍馭小臣髯絕不得去今來蕭瑟萬井空

惟見蒼山起煙霧可憐躑躅失風波仰天大叫無奈何敝車
羸馬過故苑賴遇主人杯酒多沈下賢秦夢記云泣葬一枝
紅生同死不同黎花寒食夜深閉翠微宮唐詩多流麗嫵媚
有粉繪氣或以辨博名家惟韋蘇州陳拾遺李翰林崛起爲
一種清絕高遠之言以矯之其五言精巧處不減唐人至於
古體歌行如溫泉行之類欲與李杜並驅前世惟陶同時惟
柳可以把臂入林餘人皆在下風

岑參送人落第五言云獻賦頭欲白還家衣已穿羞過灞陵
樹歸種汶陽田客舍少鄉信牀頭無酒錢聖朝無側席濟上
獨遺賢又送顏少府云愛客多酒債罷官無俸錢又宿太白
東谿李老舍寄弟姪云渭上秋雨過北風正騷騷天晴諸山

出太白峰最高主人東谿老兩耳生長毫遠近知百歲子孫
皆二毛中庭井闌上一架獼猴桃石泉飯粳香酒甕開新槽
愛茲田中趣始悟世上勞我行有勝事書此寄爾曹春夢七
言云洞庭昨夜春風起故人遠隔湘江水枕上片時春夢中
行盡江南數千里韋員外家花樹歌云今年花似去年好去
年人到今年老始知人老不如花可惜落花君莫埽大白胡
僧歌云聞有胡僧在太白蘭若去天三百尺手持楞伽入中
峰世人難見但聞鐘窗邊杖錫解兩虎牀下鉢盂藏一籠草
衣不鍼復不綫兩耳垂肩覆面此僧幾年那得知手種青
松今十圍心將流水同清淨身與淨雲無是非商山老人已
曾識願一見之何由得山中有僧人不識城裏看山共黛色

登鄴城古體云下馬登鄴城城空復何見東風吹野火暮入
飛雲殿又云城隅南對望陵臺漳水東流不復回武帝宮中
人去盡年年春色爲誰來

高適五言云散笛至棲鳥明鏡留故人又云秋菲何青青藥
苗數百畦耕耘有山田紡績有山妻檐前舉醇醪竈下烹隻
雞人生苟如此何必組與圭春望云出門何所見春色滿平
蕪可歎無知己高陽一酒徒漁樵歌云曲巖深潭一山叟駐
眼看釣不移手世人欲得知姓名良久問他不開口筍皮笠
子荷葉衣心無所營守釣磯料得孤舟無定止日暮持竿何
處歸七言句云旅館寒鐙夜不眠客心何事轉淒然故鄉今
夜應千里愁鬢明朝更一年高岑二公詩氣魄力量音調節

奏生逢開元承平之際與李杜二公更唱迭吟所謂治世之
音也天寶亂離之後所作率多窮愁感歎意錄之以觀世變
盧綸送萬巨六言云人愁村荒路細馬怯寒谿水深望盡青
山獨立更知何處相尋又白髮歎五言云髮白曉梳頭女驚
妻淚流不知絲色後堪得幾回秋過成都城云棧長山雨響
谿亂火田稀送王山人遊江東云燕歸巢已盡雅語家難尋
同柳侍郎題新昌里云庭莎成野席闌藥是家蔬夜中得循
州趙司馬書寄回使云瘴海寄雙魚中宵達我居兩行鐙下
淚一紙嶺南書地說炎蒸極人稱老病餘殷勤報賈傅莫共
酒杯疏從軍行云雪嶺無人迹冰河有雁聲李陵甘此沒惆
悵漢公卿山中別墅云葺橋雙鶴至收果眾猿隨酬麻道士

後村詩集卷三
見寄云聞逐樵夫閒看棋忽逢人世是秦時開雲種玉嫌山
淺渡海傳書怪鶴遲陰洞石幢微有字古壇松樹半無枝煩
君遠視青囊錄願得相從一問師謁液上人云半夜峰中有
磬聲偶逢樵者問山名上方月暗聞僧語下路林疏見鹿行
野鶴巢中松最老毒龍潛處水偏清願得遠公知姓字焚香
洗鉢過浮生春日登樓有懷云年來笑伴皆歸去今日晴明
獨上樓晚次鄂州云估客晝眠知浪靜舟人夜語覺潮生舊
業已隨征戰盡更堪江上鼓鼙聲姚美人拍箏歌云昭陽伴
裏最聰明出到人間才長成遙知禁曲難翻處猶自君王說
小名

李益古促促曲云促促何促促黃河九回曲嫁與掉船郎空

牀將影宿不道君心不如石那令妾貌長如玉贈邢校書云
俱從四方士共會九州中斷蓬與落葉相值各因風送流人
云謗遠人多感官微自不明疇昔長沙事三年召賈生喜見
外弟云十年離亂後長大一相逢問姓驚初見稱名憶舊容
別來滄海事語罷暮天鐘明日巴陵道秋山又幾重登夏州
城云無定河邊數株柳共送行人一杯酒胡兒起作和蕃歌
齊唱嗚嗚盡垂手又云回頭忽作異方聲一聲回盡征人首
度破納沙云眠見風來沙旋移經年不省草生時莫言塞北
無春到縱有春來何處知聽梁州曲云鴻雁新從北地來聞
聲一半卻飛回金河戍客腸應斷更在秋風百尺臺飲馬泉
云從來凍合關山路今日分流漢使前莫使行人照容鬢恐

驚憔悴入新年宿石泉驛南望黃堆峰云邊城已在虜塵中
烽火南飛入漢宮漢庭議事先黃老麟閣何人定戰功邊思
云腰懸錦帶佩吳鉤走馬曾防玉塞秋莫笑關西將家子祇
將詩思入涼州盧李中表兄詩律齊名其五七言妙絕者已
選入絕句然兩生皆從軍出塞他詩可膾炙傳誦者人多容
易看過余既毫臺悉錄於篇以備遺忘

元次山雪中懷孟武昌云冬來三度雪農者觀歲稔我夢想
已濡各得在倉廩天寒未能起孺子驚人寢云有山客來籃
中見冬簞燒柴爲溫酒煮蕨爲作瀋客亦愛杯尊思君其暢
飲所嗟山路閉時節寒已甚不能苦相邀興盡還就枕賊過
示官吏云昔歲逢太平山林二十年泉源在庭戶洞壑當門

前井稅有常期日晏猶得眠忽然遭世變數歲親戎旃今來
典斯郡山夷又紛然城小賊不屠人貧傷可憐是以陷鄰境
此州獨見全使臣將王命豈不如賊焉今彼徵斂者迫之如
火煎誰能絕人命以作時世賢思欲委符節引竿自刺船將
家就魚麥歸老江湖邊春陵行云軍國多所須切責在有司
供給豈不憂徵斂又可悲州小經亂亡遺人實困疲大鄉無
十家大族命單羸朝餐是草根暮食乃木皮出言氣欲絕意
速行步遲追呼尚不忍況乃鞭扑之郵亭傳急符來往迹相
追更無寬大恩但有迫促期欲令鬻男女言出恐亂隨悉使
索其家而又無生資聽彼道路言怨傷誰復知去冬山賊來
殺奪歲無遺所願見王官撫養以惠慈奈河重驅逐不使存

活爲安人天子命符節我所持州縣忽亂亡得罪復是誰
逋緩違詔令蒙責固所宜前賢重守分惡以禍福移亦云貴守
官不愛能適時願惟孱弱者正直當不虧何人采國風吾欲
獻此辭次山春陵五言真稷契口中語杜陵粲粲元道州之
篇卽此二詩之跋尾也然其時內租庸使外觀察使未有敢
奏劾次山以附益聚斂求上說者使遇今執牙籌析秋毫者
居主計之任則次山齋粉矣

王維五言云興闌嗁鳥換坐久落花多又烹葵邀上客看竹
到貧家又古木無人徑深山何處鐘又柘漿菰米飯蒟醬露
葵羹又行到水窮處坐看雲起時偶然值林叟談笑無還期
又住處名愚谷何煩問是非又蔡邕今已老書籍與何人早

春云憶君長入夢歸晚更生疑不及紅檐燕雙棲綠草時桃
源行云樵客初傳漢姓名居人未改秦衣服又藤花欲暗藏
孫子柏葉初齊養麝香洛陽女兒行云自憐碧玉親教舞不
惜珊瑚持與人少年行云縱死猶聞俠骨香老將行云少年
十五二十時步行奪取胡馬騎射殺山中白額虎肯數鄴下
黃鬚兒一身轉戰三千里一劍曾當百萬師漢兵奮迅如霹
靂虜騎奔騰畏蕤藜衛青不敗由天幸李廣無功緣數奇自
從棄置便衰朽世事蹉跎成白首昔時飛箭無全目今日垂
楊生左肘路旁時賣故侯瓜門前學種先生柳茫茫古木連
窮巷遼落寒山對虛牖誓令疏勒出飛泉不似潁川空使酒
賀蘭山下陣如雲羽檄交馳日夕聞節使三河募年少詔書

五道出將軍試拂鐵衣如雪色聊持寶劍動星文願得燕弓
射天將恥令越甲鳴吳軍莫嫌舊日雲中守猶堪一戰立功
勳雜五言云家住孟津河門對孟津口常有江南船寄書家
中否又君自故鄉來應知故鄉事來日綺窗前寒梅著花未
右丞不污天寶之亂大節凜然其詩擺落世閒腥腐非食煙
火人口中語其五六七言已多選入絕句今摘其古律體長
篇警句於此

劉隨州送秦系云惆悵青山路煙霞老此人新年云老至居
人下春歸在客先尋洪尊歸云鶴老難知歲梅寒未作花送
人云詩書滿蝸舍征稅及漁竿送喻德云事有皇天在歸遲
白髮生李中丞云流落征南將曾驅十萬師罷歸無舊業老

去戀明時獨立三邊靜輕生一劍知茫茫江漢上日暮復何
之餘千旅舍云渡口月初上鄰家漁未歸鄉心正欲絕何處
擣寒衣北歸次秋浦云舊路青山在餘生白首歸漸知行近
北不見鷓鴣飛松江歸宿云明月天涯夜青山江上秋一官
成白首萬里寄滄洲獄中見壁畫佛云不謂銜冤處而能窺
大悲獨棲叢棘下還見雨花時地狹青蓮小城高白日遲幸
親方便力猶畏毒龍欺六言云危石才通鳥道空山更有人
家桃源定在深處澗水浮來落花送巖維云明日行人已遠
空餘淚滴回潮別巖士元七言詩細雨溼衣看不見閒花落
地聽無聲過鄭山人居云寂寞孤鶯嘯杏樹寥寥二犬吠桃
源落花芳草無尋處萬壑千峰獨閉門見新歷云愁占蒼草

終難決病對椒花倍自憐獻李節度云家散萬金酬士死身
留一劍答君恩過賈誼宅云漢文有道恩猶薄湘水無情弔
豈知送人遊天台云落日獨搖金策去深山誰向石橋逢罪
所云斗閒誰與看冤氣盆下無由見太陽過裴舍人故居云
籬花猶及重陽發鄰笛那堪落日聽贈于越居云自用黃金
買地居能嫌碧玉隨人嫁送郭主簿赴嶺南云料錢用盡卻
為誇食客空多誰報恩此二句似為周晉山發齊一和尚影空云身寄
虛空如寓客心將生滅是浮雲又舊地曾看雙樹在空堂祇
是一鏡懸別李萬云故人早負干將氣誰言未展平生意想
君疇昔高步時肯料如今折腰事上裴尹云西城暗暗斜暉
落眾鳥紛紛皆有託獨立雖輕燕雀羣孤飛還懼鷹鷂搏自

憐天上青雲路弔影徘徊獨愁暮銜花縱有報恩時擇木誰
容託身處歲月蹉跎飛不進羽毛憔悴何人問繞樹空隨鳥
鵲驚巢林祇有鷓鴣分主人庭中蔭喬木欲此清陰愛栖宿
少年挾彈遙相猜遂使驚飛往復迴不辭奮翼向君去惟怕
金丸隨後來唐人號隨州為五言長城其五六七言絕句者
已選入絕句錢起輩非不極力欲躋攀隨州尺寸終不近旁
豈才分有所局耶即其七言長篇如上裴尹小鳥之篇反覆
宛轉詞近而意遠似為五言所蓋

張籍五言云長因送人處憶著別家時贈僧云翻經上蕉葉
挂衲落藤花宿江店云停鐙待賈客賣酒與漁家五言云月
冷邊帳溼沙昏夜探遲征人皆白首誰見滅明時又云夜鹿

伴茆屋秋狻守栗林又云犬聲籬落下草色戶庭閒七言云
一山海上無城郭惟見松碑記象州又云山東二十餘年別
今日相逢在上都說盡向來無限事相看摩捋白髭鬚又云
洛陽城裏見秋風欲作歸書意萬重復恐恩恩說不盡行人
臨發又開封又云于君去後交遊少東野無來篋笥貧賴有
白頭王建在眼前猶見詠詩人又崑崙兒云自愛肌膚黑如
漆行時半脫木棉裘白苧云皎皎山苧白且鮮將作春衣稱
少年裁縫長短不能定自持刀尺向姑前復恐蘭膏污操指
常遣旁人收墮珥衣裳著時寒食下還把玉鞭鞭白馬寄衣
曲云官家亦自寄衣去貴從妾手著君身高堂姑老無侍子
不得自到邊城裏殷勤爲看初著時征夫身上宜不宜又七

言云願爲玉鑿繫華軾終日有聲在君側又云洛陽北門北
邙道喪車麟麟入秋草車前齊唱薤露歌高墳新起白冢冢
朝朝暮暮人送葬洛陽城中人更多千金立碑高百尺終作
誰家柱下石山頭松柏半無主地下白骨多於土寒食家家
送紙錢鴟鴞作窠銜上樹人君朝市未解愁請君暫向北邙
遊又內宴歸云金吾不敢問行由又七言云誰道遠別心不
易天星墜地能爲石幾時斷得城南陌勿使居人傷行役又
云九月匈奴殺邊將漢軍全沒遼水上萬里無人收白骨家
家城下招魂葬婦人依倚子與夫同居貧賤心亦舒夫死戰
場子在腹妾身雖存如晝燭又云願君到處自題名他日知
君從此去又賞客云停杯去說遠行期入蜀荆蠻誰別離金

多眾中爲上客
夜夜算緡眠獨遲
楚宮行云章華宮中九月
時桂花半落紅橋垂
江頭騎火照輦道
君王夜從雲夢歸
下輦更衣入洞房
巴姬起舞向君王
回身垂手結明璫
願君千年萬年壽
朝出射鹿夜飲酒
永嘉行云黃頭鮮卑入洛陽
胡兒持戟升明堂
晉家天子作降虜
公卿齊走如牛羊
紫陌旌旗暗相觸
家家雞犬驚上屋
婦人出門隨亂兵
夫死眼前不敢哭
九州諸侯自願土
無人領兵來護主
北人避胡多在南
南人至今能晉語
董逃行云洛陽城頭火
瞳瞳亂兵燒我天
子宮宮城南面有深山
盡將老幼藏其間
重巖爲屋椽爲食
丁男夜行候消息
聞道官軍猶掠人
舊里如今歸未得
董逃行漢家幾時重
太平又七言云君愛龍城征戰功
妾願青樓

歡樂同人生各各有所欲
詎得將心入君腹
又還味吟云君知妾有夫
贈妻雙明珠
感君纏絲意
繫在紅羅襦
妾家高樓臨苑起
良人執戟明光裏
知君用心如日月
事夫誓擬同生死
還君明珠雙淚垂
恨不相逢未嫁時
又云上陽宮樹黃復綠
野豺來苑食麋鹿
陌上老翁雙淚垂
共說武皇巡幸時
王建五言云蛙鳴蒲葉下
魚入稻花中
又云閉門留野鹿
分食養山雞
又云妾愁貪酒甚
人怪考詩嚴
又云野羹谿菜滑
山紙水苔香
又云埽渠憂竹旱
澆地引蘭生
又云送經還野寺
移酒入幽林
六言云魚藻池邊射鴨
芙蓉苑裏看花
日色赭袍相似
不著紅鸞扇
遮寒食
行云寒食家家出
古城
老人看屋少年行
正隴年年無舊道
車徒散行入衰草
牧童驅牛

後不言卷三
下豕頭畏有家人來灑掃遠人無墳水頭祭還引婦姑望鄉
拜三日無火燒紙錢紙錢那得到黃泉還看隴上無新土此
中白骨應無主北邙行云北邙山頭少閒土盡是洛陽人舊
墓舊墓人家歸葬多堆著黃金無買處天涯悠悠葬日促岡
阪崎嶇不停轂高張素幙繞銘旌夜唱挽歌山下宿洛陽城
北復城東魂車祖馬長相逢車轍廣若長安路蒿草多於松
柏樹山頭澗底石漸稀盡向墳前作羊虎誰家石碑文字滅
後人重取書年月朝朝車馬送葬迴還起大宅與高臺溫泉
宮云十月一日天子來青繩御路無塵埃宮前內裏湯各別
每箇白玉芙蓉開朝元閣向山上起城繞青山龍煥水夜開
金殿看星河宮女知更月明裏武皇得仙王母去山雞晝鳴

宮中樹溫泉泱泱出宮流宮使年年修玉樓禁兵去盡無射
獵日西麋鹿登城頭梨園弟子偷曲譜頭白人閒教歌舞田
家行云麥收上場絹在軸的知輸得官家足不望入口復上
身且免向城賣黃犢田家衣食無厚薄不見縣門身卽樂遼
東行云年年郡縣送征人將與遼東作正墳寧爲草木鄉中
生有身不向遼東行射虎行云自去射虎得虎歸官差射虎
得虎遲獨行以死當虎命兩人相疑終不定朝朝暮暮空手
回山下綠苗成道徑遠立不敢汚箭鏃聞死還來分虎肉惜
留猛虎著深山射殺恐畏終身閒贈王樞密云三朝行坐鎮
相隨今上春宮見小時脫下御衣先賜著進來龍馬每教騎
長承密旨歸家少獨奏邊機出殿遲自是姓同親向說九重

爭遣外人知贈駙馬云金埒減添栽樂地玉鞭平與賣書人
又七言云生金有氣還尋遠仙藥成窠見即移又云薦書入
後無消息賣盡寒衣怯出城又云草堂未辦終須置松樹難
成亦且栽樂府至張籍王建道盡人意中事惟半山尤賞好
有看若尋常最奇崛成如容易極艱辛此十四字唐樂府斷
案也本朝惟張文潛能得其遺意

盧仝寄男抱孫五言云別來三得書書道違離久書處甚麤
殺且喜見汝手殷十七又報汝文頗新有當是汝母賢日夕
加訓誘竹林吾最惜新筍好看守籜龍稱正冤莫教入汝口
丁寧屬記汝汝活籜龍否兩手莫破拳一吻莫飲酒莫惱添
丁郎淚子作面垢莫引添丁郎赫赤日裏走他日吾歸來家

人皆彈糾一百放一下打汝九十九此篇用盡俗字而不害
其為奇崛何嘗似近世詩人學練字哉守歲云老來經節臘
樂事任悠悠不及兒童日都盧不解愁新蟬云泉溜潛幽咽
琴鳴乍往還長風翦不斷還在樹枝間邨醉云邨醉黃昏歸
健到三五四摩挲青莓苔嗔我驚爾不并請客云我願投黃
泉輕舉隨君去家謝井云改邑不改井此是井卦辭井公莫
驚怪說我成憨癡我縱有神力爭敢將公歸揚州惡百姓疑
我卷地皮掩關銘云蛇毒毒有形藥毒毒有名人毒毒在心
對面如弟兄美言不可聽深於千丈阮不如掩關坐幽鳥時
一聲含曦酬玉川云長壽寺石壁盧公一首詩鯨飲海水盡
露出珊瑚枝海神知貴不知價留向人間光照夜歎昨日云

昨日之日不可追今日之日須臾期如此如此復如此壯心
死盡生鬢絲秋風葉落客腸斷不辨斗酒開愁眉賢名聖行
甚辛苦周公孔子徒自欺盧馬結交時退之必見之無一語
及之豈未見耶新年云太歲祇遊桃李徑春風肯管歲寒枝
與沈山人云不復服藥求神仙神仙意智或偶然自古聖賢
放入土淮南雞犬驅上天白日上昇應不惡藥成且啜一丸
藥暫時掩上山門路釣竿插在枯桑樹當時祇有鳥窺窬更
亦無人得知處家童若失釣魚竿定是猿猴把將去玉川詩
有古樸而奇怪者有質俚而高深者有僻澀而條暢者元和
大歷閒詩人多出韓門韓於諸人多出其名惟玉川常加先
生二字退之強項非苟下人者今人但誦其日蝕及茶詩而

他作往往容易看了此公雖與世殊嗜好然以詩求之於養
生概有所聞其序閨情酒興纏綿悲壯唐以來詩客酒徒不
能道也其閒理到之言他人所棄者今存於篇又常州孟諫
議座上聞韓員外貶國子博士有感五首云忽見除書到韓
君又學官死生縱有命人事始知難烈火先燒玉庭蕪不養
蘭山夫與刺史相對兩嘖嘖又云干祿無便佞宜知黜此身
員郎猶小小國學大頻頻孤宦心肝直天王若死嗔朝廷無
諫議誰是雪韓人又曰誰憐野田子海內一韓侯左道官雖
樂剛腸得健不武侯反功名生地獄禮教死天囚莫言耕種好
須選蒺藜秋此三詩出於山人之口豈非公議在草莽耶
王昌齡五言云北登漢家陵南望長安道上有朽樹根下有

碩鼠巢高皇子孫盡千載無人過寶玉頻發掘精靈其奈何
又長信愁云邊頭何慘慘已葬霍將軍部曲皆相弔燕南代
北聞功勳多被黜兵馬亦紛更分遣黃頭戍唯當哭塞雲朝
來曲云月昃鳴珂花連繡戶春盤龍玉臺鏡惟待畫眉人
代扶風主人答云去時三十萬獨自還長安不信沙場苦君
看刀箭瘢雜興云握中銅匕首粉剗楚山鐵義士頻報讐殺
人不曾缺答武陵田太守云仗劍行千里微軀敢一言曾爲
大梁客不負信陵恩越女云摘取芙蓉花莫摘芙蓉葉將歸
問夫婿顏色何如妾青樓七言云白馬金鞍從武皇旌旗十
萬宿長楊樓頭少婦鳴箏坐遙見飛塵入建章出塞云秦時
明月漢時關萬里長征人未還但使龍城飛將在不教胡馬

度陰山采蓮曲云吳姬越豔楚王妃曾弄蓮花水溼衣來時
渡口花迎入采罷江頭月送歸浣紗女云錢塘江畔是誰家
江上女兒全勝花吳王在時人不出今日公然來浣紗昌齡
江寧人舉進士宏詞爲汜水尉以不矜細行貶世亂歸鄉爲
刺史閩江曉所殺曉不知爲誰與黃祖殺禰衡段簡殺陳子
昂事相類史稱其詩句密而思清唐人琉璃堂圖以昌齡爲
詩天子其尊之如此集存者三卷絕句高妙者已入詩選
許渾五言云鷺巢行臥柳後飲倒垂藤又云婦嬾蠶
出小姑忙題王居士云雨中耕白水雲外斷青山題峽山寺
云山風寒殿磬谿雨夜船鐙宿石屏邨云僧歸下嶺見人語
隔谿聞題韋隱居西齋云寺遠僧來少橋危客過稀又五言

云谿冰寒棹响巖雪夜窗明又云漁火夜移灣又七言云自
翦青莎織羽衣南峰煙火是柴扉萊妻早報蒸梨熟童子遙
迎種豆歸又云今夜月明何處宿九疑雲盡綠參差又云山
齋留客埽黃葉野艇送僧披綠莎又云潮生水郭蒹葭响雨
過山城橘柚疏又云龍歸曉洞雲猶溼麝過春山草自香又
云猿來近嶺獼猴散魚下深潭翡翠閑又云青山有雪諳松
性碧落無雲稱鶴心又云梧楸遠近千官冢禾黍高低六代
宮又云嵇阮沒來無酒客應劉亡後少詩人驪山云聞說先
皇醉碧桃日華浮動鬱金袍風隨玉輦笙歌迴雲卷珠簾劍
佩高鳳駕北歸山寂寂龍旗西幸水滔滔貴妃沒後巡遊少
花落宮牆見野蒿登故洛陽城云禾黍離離半野蒿昔人城

北豈知勞水聲東去市朝變山勢北來宮殿高雅噪暮雲歸
古洞蝶迷寒雨下空壕可憐緜嶺登仙子猶自吹笙歌碧桃
凌歊臺云湘潭雲盡暮山出巴蜀雪消春水來行殿有基荒
薺合寢園無主野棠開四皓廟云避秦安漢出藍關松桂花
陰滿舊山豈是無人有歸意白雲長在水潺潺渾字用晦仕
至郢州刺史居京口丁卯橋古律詩三卷名丁卯集其詩如
天孫之織巧匠之斲尤善用古事以發新意其警聯快句雜
之元微之劉夢得集中不能辨

後村詩話新集卷三

後村詩話新集卷四

宋劉克莊

張祜金山寺云僧歸夜船月龍出曉堂雲樹影中流見鐘聲
 兩岸聞孤山寺云斷橋荒蘚合空院落花深孟浩然宅云孟
 簡雖持節襄陽屬浩然送人嶺南去云珠環楊氏果翠耀孔
 家禽別甥云偶作魏舒別聊為殷浩吟靈隱師上人云貧知
 交道薄老信釋門空題惠山寺云泉聲到池盡月色上樓多
 普賢寺云潭黑龍應在巢空鶴未還又云中擘庭前棗教郎
 見赤心又云青雲舊李白憔悴為酒客贈內人云斜披玉釵
 鐙影畔剔開紅燄救飛蛾退宮人云開元皇帝掌中憐流落
 人閒二十年長說承天門上宴百官樓下拾金錢劉屏山不
見金錢打
 著人之勸飲酒云燒得硫黃漫學仙未知長付酒家錢寶常
句本此

不吃齊推藥卻在人閒八十年邠王小管云虢國潛行韓國
隨宜春深院映花枝金輿遠幸無人見偷把邠王小管吹又
云虢國夫人承主恩平明騎馬入宮門卻嫌脂粉污顏色淡
掃蛾眉朝至尊張祐崔涯同時齊名同客淮南時海宇承平
揚州繁華爲天下第一兩生以風流自命所謂十二紅樓名
姝角妓得其一盼聲價爲重張祐詩有天下三分明月夜二
分無賴是揚州及人生只合揚州死禪智山岡好墓田之句
其放浪如此然五言如斷橋荒蕪空院落花之語林和靖有
妙入神之衰同時杜牧亦云誰人得似張公子千首詩輕萬
戶侯今祐詩存者僅四卷耳然則散落多矣涯詩未之見當
考

錢起海州云山城仙島出海日印堂開又云春泉洗藥暖晴
日度花遲又云入雲投館僻采碧過帆遲又云漢幟遠成霞
胡馬來如蟻又云竹壇秋月冷山殿夜鐘清又云海潮連月
上舟火度煙來又云曲終人不見江上數峰青不犯詩題一
字而意在言
外又云求仲應難見殘陽且掩關又云秋入并州路黃榆落
故關孤城吹角罷數騎射鵬還幃幙遙臨水牛羊自下山征
人正垂淚烽火起雲閒又七言云谿雲雜雨來茆屋山雀將
雛過藥闌春郊云東風好作陽和使逢草逢花報發生題焦
道士云絲雲不散燒丹竈白鹿時藏種玉田病鶴云獨鶴聲
哀羽摧折沙頭一點留殘雪驚羣各畏野人機誰肯相將霞
外飛不及川鳧長比翼隨波雙泛復雙歸碧海滄江深且廣

目盡天倪安得往雲山隔路不隔心宛頸長鳴長在想何時
白霧卷青天接影遮飛太液前

郎士元送李騎曹云河來當塞曲山遠與沙平寄源公云罷
磬風枝動懸鐙雪屋明謁傅大士云此方今示滅何國更分
身贈韋司直云客來吳地星霜久家在零陵音信疏題精舍
寺云月在上方諸品靜心持半偈萬緣空江南尉問俗云避
地衣冠盡向南錢起與郎士元同時齊名人謂之錢郎二人
詩骨體弱而力量輕然警句膾炙人口者不可泯滅錢古詩
如病鶴篇亦有意味郎七言多新意余選絕句錢取五言十
一首郎取五七言各一首余記唐人雜書載士元嘗對客有
馬令無茶分之戲北平王一日飯客士元預焉坐閒北平醉

飽設茗供連沃數椀士元老不能禁卽席吐利交下滿座大
笑今不憶出處當考

孟郊五言云試妾與君淚兩處滴池水看取芙蓉花今年爲
誰死長安早春云乃知田家春不入五侯宅又云萱草女兒
花不解壯士憂又云野客雲作心高僧月爲性又云風葉亂
辭木雪猿清叫山又云借車載家具家具少於車又云盧仝
歸洛船崔嵬但載書又云閒似獨鶴心大於高松年又云拾
月鯨口邊又云天津橋下冰初結洛陽陌上行人絕榆柳蕭
疏樓閣閉月明直見嵩山雪

賈島五言云養雛成大鶴種子作高松又云白石通宵煮寒
泉盡日春又云竹籠拾山果瓦瓶擔石泉又云馬曾金鏃中

身有寶刀瘢又云山尋樵逕上人到雪房遲又云寒草煙藏
虎高松月照鵬又云石磬疏寒韻銅瓶結夜澌又云疏衣蕉
縷細爽味茗芽新又云鳥歸山有迹帆過浪無痕又云鳥宿
池邊樹僧敲月下門又云汲井嘗泉味聽鐘問寺名又云高
頂白雲盡前山黃葉多又云白髮無心鑷青山去意多又云
秋風吹渭水落葉滿長安又云禹留疏鑿迹舜在寂寥祠又
云秋月離喧見寒泉出定間又云木深猶積雪山淺未聞猿
又云一日不作詩心源如廢井又云落日恐行人又云詩隨
過海船七言云古來隱者多能卜欲就先生問丙丁又云霜
覆鶴身松子落月分螢影石房開唐詩人以島配郊又有郊
寒島瘦之評余謂不然郊集中忽作老蒼若硬語禪家所謂

一句撞倒牆者退之崛強亦推讓之島尤敬畏有自來東野
先生死側近雲山得散行之句以賈配孟是師與弟子並行
也賈五言有晚唐詩人不敢道

姚合五言云水氣詩書輭嵐煙筆硯濃又云尋山屐費齒書
石筆無鋒又云夜猿嘯戶外瀑水落廚中又云映竹窺猿劇
尋雲采鶴情又云愛異嫌山淺尋幽喜逕生又云顛悴王居
士顛狂不稱時棄嫌官似夢珍重酒如師無竹栽蘆看思山
疊石爲靜窗留客話古寺覓僧碁惟應尋阮籍心事遠相知
又云研露題詩潔消冰煮茗香又云野客嫌知印家人笑買
琴又云寫方多識藥失譜廢彈琴又云酒熟聽琴酌詩成削
樹題又云古廳眠易麗老吏語多虛又云教僕認書籤又云

畫壁半陳隋送邵州使君云驛路算程多是水州圖官地少
于山惜別云似把剪刀裁別恨兩人分得一般愁寄白傅云
詩中得意應千首海內閒官祇一人亡友趙紫芝選姚合賈
島詩爲二妙集其詩語往往有與姚島相犯者按賈太雕鏤
姚差律熟去韋柳尙爭等級

溫飛卿五言云雞聲茆店月人跡板橋霜又云果落見猿過
葉乾聞鹿行又云牧羊燒外鳴林果雨中拾又云拾萍萍無
根采蓮蓮有子不作浮萍根寧爲藕花死俠客行云欲出鴻
都門陰雲蔽城闕寶劍黯如水微紅濕餘血白馬夜頻驚三
更灞陵雪七言云槿籬茆舍近樵家麥隴青青一徑斜寂寞
游人寒食後夜來風雨送梨花又云宜男慢作後庭草不似

櫻桃結子紅又云悠悠楚水流如馬恨紫愁紅滿平野野土
千年怨不平至今燒作鴛鴦瓦又云擣麝成塵香不滅拘蓮
作寸絲難絕金陵云花庭忽作青蕪國謝公墅歌云朱雀航
南繞香陌謝郎東墅連春碧鳩眠高柳日方融綺榭飄飄紫
庭客文楸方罨花參差心陣未成星滿池四座無喧梧竹靜
金蟬玉柄俱持頤對局含顰見千里都城已得長蛇尾江南
王氣繫疏襟未許符堅過淮水蔡中郎云古墳零落野花春
聞說中郎有後身今日愛才非昔日莫拋心力作詞人過陳
琳墓云曾於青史見遺文今日飄蓬過此墳詞客有靈應識
我霸才無主亦憐君石麟埋沒藏春草銅雀荒涼對暮雲莫
怪臨風倍惆悵欲將弓劍學從軍祕書省有賀監草題詩云

越谿漁客賀知章任達憐才愛酒狂
鷓鴣葦花隨釣艇蛤蜊菰菜夢橫塘
出籠鸞鶴歸遼海落筆龍蛇滿壞牆
李白死來無醉客可憐神采弔殘陽

李義山西掖玩月五言云露索秦宮井
風絃漢殿箏歸墅云渠濁村春急旗高
社酒香蟬云五更疏欲斷一樹碧無情
煩君最相警我亦舉家清寄飛卿云何
因攜庾信同去哭徐陵陳後宮云茂苑
城如畫閭門瓦欲流還依水光殿更起
月華樓侵夜鸞開鏡迎冬雉獻裘從臣
皆半醉天子正無愁楚宮云歌成猶未
唱秦火入夷陵公子云歸應衝鼓半去
不待笙調金谿作云戰蒲知雁唳皺月
覺魚來越燕云去應逢阿母來莫害皇
孫無題云錦長書鄭重眉細恨分明詠
月云嫦娥

無粉黛祇是逞嬋娟壽安公主出降云事
等和強虜恩殊睦本支四郊多壘在此
禮恐無時公主嫁田承嗣之子承嗣握
兵而驕詩意歎唐朝之姑息與嫁冒頓
烏孫無異末句言諸節鎮皆有子皆欲
尙主何以待之昭肅挽詩云海迷求藥
使雪隔獻桃人哭劉蕡云空聞遷賈誼
不待相孫弘裴明府居云試墨書新竹
張琴和古松陳後宮云渚蓮參法駕沙
鳥犯鉤陳鄭大有隱居云石梁高瀉月
樵路細侵雲題李暮壁云舊箸思元賦
新編雜擬詩撰彭陽公誌云敢伐不加
點猶當無媿詞詠懷寄舊僚云僕御嫌
夫懦孩童笑叔癡少男方嗜栗幼女漫
憂葵聖女祠七言云一春夢雨常飄瓦
盡日靈風不滿旗潭州云陶公戰艦賈
傅承塵平淮西碑云點竄

堯典舜典字塗改清廟生民詩公之斯文若元氣先時已入
人肝脾寄令狐學士云賡歌太液翻黃鵠從獵陳倉獲碧雞
杜工部蜀州離席云雪嶺未歸天外使松州猶駐殿前軍楚
宮云已聞佩響知腰細更辨絃聲覺指纖無題云肩裁月魄
羞難掩車走雷聲語未通并絡云堪歎故君成杜宇可能先
主是真龍北齊云小憐玉體橫陳夜已報周師入晉陽寄令
狐郎中云休問梁園舊賓客茂陵秋雨病相如李家園云惟
有夢中相近分臥來無睡欲如何嫦娥云嫦娥應悔偷靈藥
碧海青天夜夜心隋宮云紫泉宮殿鎖煙霞欲取蕪城作帝
家玉璽不緣歸日角錦帆應是到天涯於今腐草無螢火終
古垂楊有暮鴉地下若逢陳後主豈宜重唱後庭花籌筆驛

云魚鳥猶疑畏簡書風雲長爲護儲胥徒令上將揮神筆終
見降王走傳車管樂有才真不忝關張無命欲何如七夕云
由來碧落銀河畔可要金風玉露時馬嵬云此日六軍同駐
馬當年七夕笑牽牛如何四紀爲天子不及盧家有莫愁九
日云曾共山公把酒時霜天白菊滿階墀十年泉下無消息
九日尊前有所思不學漢臣栽苜蓿空教楚客詠江離郎君
官貴施行馬東閣無因得再窺錦瑟云莊生曉夢迷蝴蝶望
帝春心託杜鵑滄海月明珠有淚藍田日暖玉生煙相傳瑟
有適怨清和四音於此二聯見之或云令狐楚家青衣名也
河中云九廟無塵八馬回奉天城壘長春苔咸陽原上英雄
骨半向君家養馬來無題云春風自共何人笑枉破陽城十

萬家絕句云臨邛不見馬相如更欲南行問酒壚行到巴西
覓譙秀巴西惟是有寒蕪宮妓云珠箔輕明拂玉墀披香新
殿鬪腰枝不須看盡魚龍戲終遣君王怒偃師夕陽樓云花
明柳暗繞天愁上盡重城更上樓欲問孤鴻向何處不知身
世自悠悠吳宮云龍檻沈沈水殿清禁門深掩斷人聲吳王
宴罷滿宮醉日暮水漂花出城鈞天上帝鈞天會眾靈昔
人因夢到青真伶倫吹裂孤生竹卻爲知音不得聽温庭筠
與商隱同時齊名時號温李二人記覽精博才思橫逸其豔
麗者類徐庾其切近者類姚賈義山之作尤煅煉精粹探幽
索微不可草草看過世傳飛卿傲婦翁亦可見其不羈
鄭谷五言云春陰妨柳絮月黑見梨花又云鬻蔬貧潔淨中

酒病風流又云染岸蒼苔古翹沙白鳥鳴又云潮來無別浦
木落見他山夕陽云長天急遠鴻潯陽縣廳云野泉當案落
汀鷺入衙飛又云縣官清且儉深谷有人家一徑入寒竹小
橋穿野花碓喧春澗滿梯倚綠桑斜自說年來稔前邨酒可
賒七言云愛僧不愛紫衣僧又云酒醒蘚砌花陰轉病起漁
舟鷺迹多又云夜深雨絕松堂靜一點山螢照寂寥又雪云
亂飄僧舍茶煙濕密灑高樓酒力微江上晚來堪畫處漁人
披得一蓑歸秋扇云汗流浹背曾施手氣爽中宵便負心七
祖院小山云峨眉咫尺無人去卻向僧窗看假山海棠云穠
麗最宜新著雨嬌嬈全在欲開時鷓鴣云雨昏青草湖邊過
花落黃陵廟裏唳遊子乍聞征袖濕佳人才唱翠眉低讀李

白集云何處文星與酒星一時鍾在李先生高吟大醉三千
首留著人閒伴月明燕云低飛綠岸和梅雨亂入紅樓掠杏
梁閒几視中窺水淺落花逕裏得泥香千言萬語無人會又
逐流鶯過短牆谷集名雲臺編有詩三百首五七言多警聯
今錄其尤者於編谷詩自好然集中所作若步趨辭能者讀
能集云李白欺前輩陶潛仰後塵太白視谷斐然小子淵明
人物高勝何至仰能輩後塵然余所錄以意義爲主不可以
人廢言

辭能春日寓懷七言云青春背我重重去白髮欺人故故生
獻僕射云朝廷有道青春好門館無私白日閑楊柳云隋家
力盡虛栽得無限春風屬聖朝閒題云舊將已成三僕射老

身猶是六尙書漢南春望云幾處松筠燒後死誰家桃李亂
中開自古浮雲蔽白日洗天風雨幾時來老人云清瘦形容
八十餘匏懸籬落似村居勸師莫羨人間有幸是元無免破
除能詩十卷僅數百首絕句佳者已入選其未入選者姑摘
出一聯或一二句又答寄茶七言云羸官乞與真拋卻賴有
詩情今得嘗此一聯不在集中殊不可曉鄭谷師若人詩安
得高出其上

秦系五言云埽地青牛臥栽松白鶴栖又云漚苧成魚網剝
椰作酒卮又云上簾疑晚景臥簟覺新秋又云謝安無箇事
忽起爲蒼生李尊師山居云洗藥每臨新瀑水步虛時上最
高峰系詩僅百餘首而清趣翛然自天寶至正元先隱剡川

後徙南安九日山又客丹陽壽八十餘歲不應賦詠寂寥簡
短如此必有遺軼者世傳系晚與妻仳離當時送妻歸丹陽
耳韋蘇州與系詩知掩山扉三十秋魚須翠碧棄牆頭莫道
謝公方在郡五言今日爲君休韋公五言獨步一世而憐才
下士如此辭能輩才道一聯半句便妄自尊大矣

方干五言云落葉憑風掃香粳倩水春贈喻曷云才吟五字
句又白幾莖髭又云吟成五字句用破一生心又云坐月何
曾夜聽松不似秋又云獵者聞疏磬知師入定回又云樹影
搜涼臥苔光破碧行又云疏磬白雲寺孤砧紅葉村寄清越
上人云窗接停猿樹巖飛浴鶴泉鄉叟云青山前代業老樹
此身移七言云鶴盤遠勢投孤嶼蟬曳殘聲過別枝哭喻曷

云撰碑縱託登龍伴營奠應支賞鶴錢贈崔明府云壓酒曬
書猶檢點修琴取藥似支關與鑿休上人云山夜獵徒多信
火雨天材舍未催蠶送王霖赴舉云北闕上書衝雪早西陵
中酒趁潮遲寄陳端公云雲島采茶常失路雪龕中酒不關
扉送永王令云浮客若容開荻地釣翁應免稅苔田廢宅云
樵叟和巢伐桃李牧童兼草蹋蘭蓀東陽道中云醉醒已在
他人界猶憶東陽昨夜鐘過姚監故居云不敢要君徵亦起
致君全得似唐虞讜言昨歎離天聽新冢今聞入縣圖琴鎖
壞窗風自觸鶴歸喬木夜難呼學書弟子何人在檢點猶逢
諫草無哭陳陶云 巢父 客兒千字雄飛新定
人貌寢兔缺始見姚合合卑之及覽其詩駭目變容賓客館

之登山臨水必與焉會稽太守王龜以其亢直宜在諫署薦
之會王薨事寢卒光啟文德閒臨終語其子曰吾詩人自知
之誌吾墓者紀其歲月而已其詩高處在晚唐諸公之上
韓偓火蛾云陽光不照臨積陰生此類非無惜死心奈有賊
明意幽窗云手香江橘嫩齒軟越梅酸又云和裙穿玉鐙隔
袖把金鞭又強語戲同伴圖郎聞笑聲召對歸本院云坐久
忽疑槎犯斗歸來兼恐海生桑如今冷笑東方朔惟用談諧
事漢皇錫宴云不敢通宵離禁直晚來殘醉入銀臺苑中云
外使調鷹初得按中宮過馬不教嘶笙歌錦繡雲霄裏獨許
詞臣醉似泥湖南少含桃有感云苦筍愁難同象七酪漿無
復瑩蟻珠

每歲初進
先賜學士

欲明云山僧互乞新詩去酒保頻徵舊

債來贈隱逸云蜂彈窗紙塵侵硯鳥鬪庭花露滴琴寄隱者
云長松夜落釵千股小港春添水半腰失鶴云幾時翔集來
華表每日沈吟看畫屏安貧云謀身拙爲安蛇足報國危曾
捋虎須殘春云樹頭蜂抱花鬚落池面魚吹柳絮行八月六
日云御衣空惜侍中血國璽幾危皇后身倚醉云分明窗下
聞裁翦敲徧闌干喚不應醉著云漁翁醉著無人喚過午醒
來雪滿船寄道侶云夜來雪壓前村竹賸見谿南幾尺山暮
春云四時最好是三月一去不回惟少年亂後野塘云世亂
他鄉見落梅野塘晴夜獨徘徊船衝水鳥飛還住袖拂楊花
去卻來季重舊游多喪逝子山新賦極悲哀眼看朝市成陵
谷始信昆明是劫灰翠碧鳥云天長水遠網羅稀保得重重

翠碧衣挾彈少年多害物勸君莫近五陵飛哭花云曾愁香
結破顏遲今見妖紅委地時天若有情爭不哭夜來風雨葬
西施美成詞云葬楚宮傾國本此髻云髻根鬆慢玉釵垂指點花枝又過
時坐久暗生惆悵事因人句卻淚臙脂韓偓與吳融同爲詞
臣偓忠於唐爲朱三面斥貶責不悔如捋虎鬚之句未嘗傳
誦似爲香奩所掩及朱三篡弑偓羈旅於閩時王氏割據詩
文祇稱唐朝官職與淵明稱晉甲子異世同符余讀其集而
壯其志錄其警聯於編內三數篇自述其玉堂遭遇唐季非
復承平舊觀而待詞臣之禮猶然存之以補金鑾記之闕
吳融和韓學士秋夕禁直偶雪云硯冰憂詔急鐙盡惜更殘
重陽日荊州云舊國莫歸戎馬亂故人何在塞鴻來丹陽云

山帶梁朝陵路斷水連劉尹宅基平岐下聞子規云但有花
知噉血處更無獲替斷腸哀還俗尼云三峽卻爲行雨客九
天曾是散花人兵後經汴云金鏃有苔人拾得蘆花無土鳥
銜將過九成宮云魏公碑字封蒼蘇文帝泉聲落野田碑乃歐陽
率更書豈魏公有別碑乎宋玉宅云已懷湘浦招魂事更憶高唐說夢時
杏云獨照影時臨水畔最含情處出牆頭裴公洛居云門前
立使修書嬾花下留賓壓酒忙過鄧城縣云未知堯桀誰非
是可使彭殤有短長楊花云百花長恨風吹落惟有楊花獨
愛風潮云暮去朝來無定期桑田長被此聲移蓬萊若採人
閒事一度還應兩度知山僧云石臼山頭一老僧朝無香積
夜無鐙近嫌俗客知蹤跡疑向中方斷石層廢宅云風飄碧

瓦雨摧垣卻有鄰人爲鎖門幾樹好花空白晝滿庭芳草易
黃昏放魚池涸蛙爭聚棲燕梁空雀自喧不獨淒涼眼前事
咸陽一火便成原題湖城西槐樹云零落敲斜北路中盛時
曾識太平風曉迷鶴駕歸春苑暮送鸞旂指洛宮一自煙塵
生薊北更無消息幸關東而今祇有孤根在鳥啄蟲穿沒亂
蓬吳子華詩五言合作絕少七言佳者不減致光致光以忤
朱三貶竄子華詩有南遷七絕未知所坐何罪豈坐致光之
黨耶

羅隱題方干詩云九霄無鶴板雙鬢老漁舟懷孟夷庚云中
原正兵馬相見在何時菊云千歲白衣酒一生青女霜臺城
云兵來吾有計金井玉柁闌除夜云厭寒思暖律畏老惜更

殘兒童不諳事歌吹待天明寄顧紹宗云青山無路入白髮
滿頭生鶯聲云金屋夢初覺玉關人未歸牡丹云若教解語
應傾國任是無情亦動人黃河云解通銀漢應須曲才出崑
崙便不清又云三千年後知誰在何必勞君見太平游禪智
寺云思量祇合騰騰醉煮海平陳一夢中江令宅云還有往
年金蟄井牧童樵叟等閒窺籌筆驛云時來天地皆同力運
去英雄不自由建康云庾舅已能窺帝室王郎還是預人家
又云欲起九原看一徧秦淮聲急日西斜寄夏州胡常侍云
仍聞隴蜀猶多事深喜將軍未白頭魏令公附卷有回云馬
上固慚銷髀肉幄中猶羨愈頭風送梅處士云亂離且喜身
俱在存沒那堪耳更聞題張逸人所居云芳樹文君機上錦

遠山孫壽鏡中眉詠史云徐陵筆硯珊瑚架趙勝賓朋玳瑁
簪中元夜泊淮口云錦帆天子狂魂魄應過揚州看月明寄
竇常侍云噴香瑞獸金三尺舞雪佳人玉一團早發云酷憐
一覺平明睡長被雞聲惡破除鄴城云英雄亦到分香處能
共常人校幾多西施云西施若解亡吳國越國亡來又是誰
故都云至竟不如隋煬帝破家猶得到揚州嚴陵灘云世祖
昇遐夫子死原陵不及釣臺高范公雲臺不及釣臺高句亦本此詠月云蟾
向靜中矜爪距兔假明處弄精神嫦娥老大應惆悵倚泣蒼
蒼桂一輪關亭春望云越信功夫高似狗裴王氣力大於牛
未知至竟將何用渭水涇川一向流題潤州妙善寺石羊云
孫權劉備嘗會於此紫髯蒼蓋此沈吟狼石猶存事可尋漢鼎未分聊

把手楚醪雖美肯同心始皇陵云荒原無草樹無枝嬾向行
人問昔時六國英雄漫多事到頭徐福是男兒鸚鵡云莫恨
雕籠翠羽殘江南城暖隴西寒勸君不用分明語語得分明
出轉難曲江云別愁如瘧避還來隱字昭諫新城人唐季有
詩名膾炙人口有江東集十卷其詩自光啟以後廣明以前
海內亂離乘輿播遷艱難險阻之事多見之賦詠時魏府節
度使王智興學隱爲詩自號詩卷爲偷江東集
劉義自問云自問彭城子何人接汝顛酒腸寬似海詩膽大
如天入蜀云峽色侵天去江聲滾地來逢盧仝云上樓腰腳
健懷土眼睛穿勸姚合酒云何曾見天上著得劉安宅答孟
東野云寒酸孟夫子苦愛老義詩生澀有百篇謂是瓊瑤辭

嘲荆卿云白虹千里氣血頸一劍義報恩不到頭徒作輕生
士姚秀才愛余小劍因贈云一條古時水向我手心流臨行
應贈君勿薄細碎讐又少爲俠行因酒殺人亡命會赦出折
節讀書能詩聞韓愈接天下士徒步歸之作冰柱雪車二詩
出盧仝孟郊右後以爭論語不能下對賓客持愈金數斤去
曰此諛墓中人得耳不若與劉君爲壽愈不能止歸齊魯不
知所終

後村詩話新集卷四

後村詩話新集卷五

宋劉克莊

韓愈古賦云一邑之水可走而違天下湯湯曷其而歸五言
云晴雲如擘絮新月似磨鎌和席八十二韻云多情懷酒伴
餘事作詩人秋懷云犀首空好飲廉頗尙能飯又云斂退就
新儒趨營悼前猛又云有如乘風船一縱不可纜哭楊兵曹
款陸欵州參云人皆期七十才半豈蹉跎數出知已淚自然
白髮多晨興爲誰慟還坐久滂沱論文與晤對已矣兩如何
送石處士云長把種樹書人云避世士忽騎將軍馬自號報
恩子風雲入壯懷泉石別幽耳鉅鹿師欲老常山險尤恃豈
惟彼相愛固是吾徒恥去去事方急酒行可以起岐山下云
丹穴五色羽其名爲鳳皇昔周有盛德此鳥鳴高岡和聲隨

後村詩集卷五
祥風窈窕相飄揚聞者亦何事但知時俗祥自從姬旦死千
載闕其光吾君亦勤理遲爾一來翔路旁埃云堆堆路旁埃
一雙復一隻迎我出秦關送我入楚澤千以高山遮萬以遠
水隔何當迎送歸緣路高歷歷雜詩云朝蠅不須驅暮蚊不
可拍得時能幾時與汝恣啖昨涼風九月到掃不見蹤跡從
仕云閒居食不足從事力難任兩事皆害性一生怕苦心黃
昏歸私室惆悵起歎音棄置人間世古來非獨今醉贈張祕
書云君詩多態度藹藹春空雲東野動驚俗天葩吐奇芬張
籍學古淡軒昂避雞羣又云長安眾富兒盤饌羅羶葷不解
文字飲惟能醉紅裙贈惠師云佛法入中國爾來六百年齊
民逃賦役高士著幽禪韓公稱士友雖李翱籍湜不過三數

篇或發于記序書尺惟與僧詩多四十餘韻或三四十韻其
閒多諛浪笑傲之詞而緇流不悟往往欲附名集中以為榮
寵可發千載一笑薦士云有窮者孟郊受才實雄鷲冥觀洞
古今象外逐幽好橫空盤硬語妥帖力排鼻敷柔肆紆餘奮
猛卷海濤榮華肖天秀捷疾逾響報行身踐規矩甘辱恥媚
寵孟軻分邪正眸子看瞭眊杳然粹而清可以鎮浮躁魯侯
國至小廟鼎猶納郤幸當擇珉玉寧有棄珪瑁此篇四十韻
錄十韻于此孟東野失子云失子將何尤吾將上九天汝實
主下人予奪一何偏彼于汝何有乃令蕃且延此獨何罪愆
生死旬日間上呼無所聞滴地淚到泉地示為之悲瑟縮久
不安乃呼大靈龜騎雲款天門問天主下人厚薄胡不均天

曰天地人由來不相關吾懸日與月吾繫星與辰日月相噬
嚙星辰踏而顛吾不汝之罪知非汝由緣且物各有分孰能
使之然有子與無子禍福未可原魚子滿母腹一一欲誰憐
細腰不自乳舉族長孤懸鴟鴞啄母腦母死子始蕃蝮蛇生
子時折裂腸與肝好子雖云好未還恩與勤惡子不可說鴟
鴞蝮蛇然有子且勿喜無子固勿歎上聖不待教賢聞語而
遷下愚聞語惑雖教無由悛大靈頓首受卽日以命還地示
謂大靈汝往告其人東野夜得夢有夫玄衣巾鬪然入其戶
三稱天之言再拜謝玄天收悲以歡欣此篇甚奇古非樊宗
師盧仝輩所能道寄崔立之云傲兀坐試席深叢見孤羸四
座各低面不敢振眼窺升階揖侍郎歸舍日未昃佳句喧眾

口考官敢瑕疵老婦願嫁汝約不論財資老翁不量分累月
笞其兒歡華不滿眼咎責塞兩儀寄崔立之五十餘韻其述
崔丞場屋才敏舉人之所喜誦押寬韻易押險韻難寬韻雖
累至百有甚工緻孟生云孟生江海士古貌又古心騎驢到
京國欲致薰風琴豈識天子居九重鬱沈沈一門百夫守無
籍不可尋誰憐松桂性競愛桃李陰顧我多慷慨窮檐時見
臨清宵靜相對髮白苦聆吟答孟郊云朝餐動及午夜諷恆
至卯齒落云語訛默固好嚼廢輒還美余晚喪明歐陽公權
祕書勸余閉目勿視援此二句頗有意味病中贈張十八云
夜闌縱掉闔多口疏眉麗勢倅高陽翁坐約齊橫降答龍吏
篇不以風土之惡弱鱔魚之暴橫爲憂而一篇三致意負罪

引慝于身而無一語歸怨于上惟韓杜二公爲然雙鳥詩舊
注爲佛老二氏作內云天公怪兩鳥各捉一處囚若將火其
書廬其居人其人矣然末云還當三千秋更起鳴相酬二氏
之陷溺人心深矣猛虎行云猛虎誰云惡亦各有匹儕羣行
深谷聞百獸望風低身食黃熊父子食赤豹麋擇肉于熊羆
肯視兔與狸正晝當谷眠眼有百步威自矜無當對氣性縱
以乖朝怒殺其子暮還食其妃匹儕四散走猛虎還孤棲狐
鳴鬪四旁出逐猴入居烏鵲從噪之虎不知所歸誰云猛虎
惡中途正悲唬豹來銜其尾熊來攫其頤猛虎死不辭但慙
前所爲虎兒無助死況知汝細微故當結以信親當結以私
親故且不保人誰信汝爲韓杜二公有至百韻者但韓喜押

窄韻杜喜押寬韻以余觀之窄韻尤難如魚許押三蕭字
十八韻語多警策精衛銜石填海云何慙刺客傳不著報讎
名李員外寄紙筆云兔尖鍼莫並繭淨雪難如晚泊江口云
二女竹上淚孤臣水底魂順宗皇帝挽詞云鳳飛終不返劍
化會相從送鄭尙書赴南海云蓋海旗幢出連天觀閣開衙
時龍戶集上日馬人來風靜鷄鷓去官廉蚌蛤回退之五言
云曾經聖人手議論安敢到然石鼓歌云陋儒編詩不收入
二雅褊迫無委蛇孔子西行不到秦倚撫星宿遺義娥秀才
家無頭惱如此贈侯喜云暫動還休未可期蝦行蛭渡似皆
疑舉竿引綫忽有得一寸才分鱗與鬚君欲釣魚須遠去大
魚豈肯居沮洳記夢詩注家以爲公左遷右庶子作時李逢

德和詩話卷五
吉當國公有和侯喜筍詩二十八韻用事託意信如注家所言贈崔羣云何人有酒身無事誰家多竹門可疑記夢云夜夢神官與我言羅縷道妙角與根我聽其言未云足捨我先度橫山腹側身上視谿谷盲杖撞玉版聲彭觥神官見我開顏笑前對一人壯非少者哦七言六字常語一字難我以指撮白玉丹行且咀嚙行詰盤口前截斷第二句綽虐顧我顏不歡乃知先人未賢聖護短憑愚邀我敬我能屈曲自世間安能從汝巢神山公南遷因論佛骨忤憲宗意然丞相度及貴戚皆論救此詩所謂我能屈曲自世間安能從汝巢神山可見宗閔怙權植黨公崛強不屈意赤藤杖歌云赤藤爲杖世未窺臺郎始攜自滇池滇王埽宮邀使者跪進再拜語盟

咿繩橋挂過免傾墮性命造次蒙扶持途經百國皆莫識君臣聚觀逐旌麾共傳滇神出水獻赤龍拔鬚血淋漓又云羲和操火鞭暝到西極睡所遺幾重包裹自題署不以珍怪誇荒夷歸來持贈同舍子浮公照手欲抱疑空堂晝眠倚牖戶飛電著壁搜蛟螭玉川子月蝕詩一千六百七十一字韓公病其繁省去千餘字然題爲效玉川子作退之豈效體者謙詞也醉留東野云昔年因讀李白杜甫詩長恨二人不相從吾與東野生並世如何復躡二子蹤東野不得官白首誇龍鍾韓子稍姦黠自慚青蒿倚長松低頭拜東野願得終始如駟蚤東野不回頭有如寸筵撞巨鐘吾願身爲雲東野變爲龍四方上下逐東野雖有別離無由逢藍關示湘云一封朝

奏九重天夕貶潮陽路八千欲爲聖朝除弊政豈將衰老惜
殘年雲橫秦嶺家何在雪擁藍關馬不前知汝遠來應有意
好收吾骨瘴江邊余嘗謂選古今詩先正推韓歐曾范大儒
惟周程張邵及近世朱張呂葉不可以詩論然諸老先生之
集具存或未嘗深考而細味之或畏其名盛而不敢輕下注
腳自唐以來李杜之後便到韓柳韓詩沈著痛快可以配杜
但以氣爲之直載者多雋永者少白詩云退之服硫黃一病
竟不痊按退之作李公墓誌力詆其服餌金丹之謬其卒北
歸之役嘗以病滿百日求免官張籍祭詩具言其病有孺人
侍藥湯之句初無服硫黃之說世傳公臨終呼諸僧語之曰
汝詳視吾手足無出外証人云韓愈病癩死公達生如此安

肯服剛劑求活微之鍊秋石之說亦未詳所出

柳宗元五言云豈知千仞墜止爲一毫差又云引泉開故竇
護藥插新筓又云海俗衣猶卉山夷髻不鬢又云危根一以
振齊斧來相尋又靈壽木不知爲何物以柳詩考之云柔條
乍反植勁樹常對生循玩足忘疲稍覺步武輕安能事剪伐
持用資徒行詠荆軻云千金奉短計七首荆卿趨造端何其
銳臨事竟趨趙慈父斷子首狂走無容軀夷城芟七族臺觀
皆焚汚始期憂患弭卒動災禍樞秦皇本詐力事與桓公殊
奈何效曹子實爲勇且愚世傳故多謬太史徵無且詠荆軻
者多矣此篇勇且愚之評與淵明惜哉劍術疏之語同一意
脈陶柳詩率含蓄不盡章使君黃谿祈雨見召云驕陽愆歲

事良牧念蓄畬列騎低殘月鳴笳度碧虛猶窮樵客路遙駐
野人居谷口寒流淨叢祠古木疏焚香秋霧溼奠玉曉光初
胥蠻巫言報精誠禮物餘惠風仍偃草靈雨會隨車俟罪非
眞吏翻新奉簡書晨詣超師院讀禪經云道人庭宇靜苔色
連深竹日出霧露餘青松如膏沐贈江華長老云空室無侍
者巾屨惟挂壁又云風窗疏竹響露井寒松滴道旁孤松往
來斫以爲明好事者編竹成圍感而賦詩云孤松亭翠蓋託
根臨廣路不以儉自妨遂爲明所誤幸逢仁惠意重此藩籬
護猶有半心存時將承雨露田家云籬落隔煙火農談四鄰
夕庭除秋蟲吟疏麻方寂歷蠶絲盡輸稅機杼空倚壁里胥
夜經過雞黍事筵席各言官長峻文字多督責東鄉後租期

車轂陷泥澤公門少推恕鞭扑恣狼藉努力慎經營肌膚眞
可惜又云古道繞蒺藜榮回古城曲蓼花被隄岸陂水寒更
綠是時收穫竟落日多樵牧風高榆柳疏霜重梨粟熟行人
迷去住野鳥競棲宿田翁笑相念昏黑巡原陸掩役夫張進
骸云生死悠悠爾一氣聚散之偶來紛喜怒奄忽已復辭爲
役孰賤辱爲貴非神奇一朝曠息定枯朽無妍媸生平勤阜
樞對秣不告疲旣死結轉犢葬之東山基奈何值崩湍蕩析
臨路垂饒然暴百體散亂不復支從者幸告子睦之漕然悲
虎貓獲迎祭犬馬有蓋帷佇立唁爾魂豈復識此爲畚鍤載
埋瘞溝瀆護其危我心得所安不謂爾有知掩骼著春令茲
焉識其時及物非吾輩聊且顧爾私又南澗云秋氣集南澗

獨游亭午時回風一蕭瑟林影久參差使至若有得稍深遂
忘疲羈禽響幽谷寒藻舞淪漪去國魂已逝懷人淚空垂孤
生易爲感失路少所宜索寞竟何事徘徊止自知誰爲後來
者當與此心期又簡吳武陵云理世固輕士棄捐湘之湄陽
光竟四溟敲石安所施鍛羽集枯條低昂互鳴悲翔雲吐風
寒寂歷窮秋時君子尙容與小人守競危慘悽日相視離憂
坐自滋尊酒聊可酌放歌諒徒爲惜無協律者窈眇絃吾詩
七言云盛時一去貴反賤桃笙葵扇安可常又漁翁夜傍西
巖宿曉汲清湘然楚竹煙銷日出不見人欸乃一聲山水綠
嶺南江行云瘴江南去入雲煙望盡黃茆是海邊山腹雨晴
添象迹潭心日暖長蛟涎射工巧伺遊人影颺母偏驚旅客

船從此憂來非一事豈容華髮待流年柳州峒民云郡城南
下接通津異服殊音不可親青箬裹鹽歸洞客綠荷包飯趁
墟人鵝毛禦臘縫山屬雞骨占年拜水神哭呂衡州云衡岳
新摧天桂峰士林憔悴泣相逢止令文字傳青簡不使功名
上景鐘三畝空留懸磬室九原猶寄若堂封遙想荊州人物
論幾回中夜惜元龍跋烏詞云城上日出羣鳥飛鷓鴣爭赴
朝陽枝刷毛神翌和且樂爾獨落魄今何爲無乃慕高近白
日三足妬爾令爾疾無乃飢唬走路旁貪鮮攫肉人所傷翅
自獨足下叢薄口銜低枝始能躍還顧泥塗備螻蟻仰看棟
梁防燕雀左右六翮利如刀踊身失勢不得高枝離無恥猶
自免努力低飛逃後患韓柳齊名然柳乃本色詩人自淵明

沒雅道幾熄當一世競作唐詩之時獨爲古體以矯之未嘗
學陶和陶集中五言凡十數篇雜之陶集有未易辨者其幽
微者可玩而味其感慨者可悲而泣也其七言五十六字尤
工五七言絕句已別選退之作羅池廟碑云侯嘗與部曲歐
陽翼等曰明年吾死死而爲神後三年降于州之後堂歐陽
翼等見而拜之又云生能澤其民死能禍福驚動之又云過
客李儀醉酒慢侮扶出卽死恐非不語神怪之義王初寮詩
云子厚文章百世師尋常稽首望羅池雷霆不碎韓詩板醉
侮何心怒李儀若爲子厚分疏者

劉禹錫八陣圖云會有知兵者臨流指是非寄嚴司空云歡
謠開竹棧拜舞擲桑弓早發云寒樹鳥初動霜橋人未行早

秋集賢院云蕙草香書殿槐花點御溝又云問卜安冥數看
方理病源送客云神林社日鼓茅屋午時雞和微之云樞斲
無價馬庭發有名花又云昨宵鳳池客今日雀羅門又云興
情逢酒在筋力上樓知又云遊魚將婢從野雉見媒驚又云
殘兵疑鶴唳空壘辨烏聲詠史云賈生明王道衛綰工車戲
同遇漢文時何人居貴位初至長安云每行經舊處卻想似
前身不改南山色其餘事事新田歌云計吏語田夫長安眞
大處省門高峩峩儂人無度數昨來補衛士惟用竹筒布君
看二三年我作官人去羅浮云夜宿最高峰瞻空浩無鄰海
黑天宇曠星辰來逼人時當朏魄陰物恣騰振日光吐鯨
背劍影開龍鱗倏若萬馬馳旌旗聳齋淪又如廣樂奏金石

舍悲辛疑其有巨靈怪物盡來賓陰陽迭用事仍俾夜作晨
呶啞天雞鳴扶桑色昕昕赤波千萬里湧出黃金輪下視生
物息霏如隙中塵醯雞仰甕口亦謂雲漢津世人信耳目方
寸度大鈞安知視聽外怪愕不可陳擣衣曲云爽砧應秋律
繁杵含悽風一一遠相續家家音不同戶庭凝露清伴侶明
月中長裾委襞績輕佩垂璫瓏汗餘衫更馥鈿移麝半空報
寒驚邊雁促思聞候蟲天狼正芒角虎落定相攻盈篋寄何
處征人如轉蓬古詞云讀得玄女符生當事邊時往來長秋
閒能帶雙鞬馳崩騰天寶末塵暗燕南垂燿火入咸陽詔徵
神武師是時占軍募插羽揚金羈萬夫列縣門觀射中戟枝
中宵倚長劍起視崑尤旗陰風獵百草旗燦光參差曾禽白

馬將虜騎不敢追貴臣上戰功名姓隨意移終歲肌骨苦他
人印纍纍謁者既清宮諸侯各罷戲上將賜北第門戟不可
窺昔血下沾襟天高問無期卻尋故鄉曲孤影空相隨遊桃
源云姪女飛丹砂青童護金液寶氣浮鼎耳神光生劍脊七
言春望云田中牧豎燒芻狗陌上行人看石麟澧州云梅蕊
覆階鈴閣暖雪峰當戶戟枝寒水亭避暑云琥珀杯烘疑漏
酒水精簾瑩更通風碁云雁行布陣眾未曉虎穴得子人皆
驚送僧云暖狖窺齋林葉動蛟龍聞呪浪花低寄令狐相公
云少有一身兼將相更能四面占文章與歌者米嘉榮云近
來時世輕先輩好染髭鬚事後生江陵道中云行到南朝征
戰地古來名將盡為神又云醜裘君長迎風懼錦領酋豪躡

雪行又云離別苦多相見少一生心事在書題又云隔簾惟
見中庭草一樹山榴依舊開又云階蟻相逢如偶語園蜂急
去恐違程荆門道上懷古云南國山川舊帝畿宋臺梁館尙
依稀馬嘶古樹行人歇麥秀空城澤雉飛風吹落葉填宮井
火入荒原化寶衣徒使詞臣庾開府咸陽終日苦思歸平齊
行云開元皇帝東封時百神受職爭奔馳千鈞猛虜順流下
洪波涵淡淨熊羆侍臣宴公秉文筆玉檢告天無媿詞當今
叡孫承聖祖岳神望幸河宗舞青門大道屬車塵共待葳蕤
翠華舉牆陰歌云白日左右浮天潢朝晡影入東西牆昔爲
兒童在陰戲當時意小覺日長東隣侯家吹笙簧隨陰促促
移象牀西鄰田舍乏糟糠就影汲汲春黃梁因思九州四海

外家家只占牆陰內莫言牆陰數尺閒老卻主人如等閒西
塞山云西晉樓船下益州金陵王氣黯然收千尋鐵鎖沈江
底一片降幡出石頭夢得德宗朝已爲郎官御史坐佐文黨
久斥于外晚與樂天皆爲午橋賓客累官至侍從然八十餘
矣既死微之有五言云併失鴛鴦侶空餘麋鹿身只應嵩少
下長作獨遊人

杜牧五言云韓彭不再生英雄皆爲鬼又云少陵鯨海動翰
苑鶴天寒又云大熱去酷吏清風來故人又云微雨池塘見
好風襟袖知又云圓疑竊龍頰色又奪雞窗又云青漢龍髯
絕蒼山馬鬣悲又云微雨秋栽竹孤鐙夜讀書又云蓬蒿三
畝居寬于一天下又云自嫌如匹素刀尺不由身又云誰知

病太守猶得作茶仙又云四百年炎漢三十代宗周二三里
遺堵八九所高兀又云偃蹇松公老森巖竹陣齊小蓮娃欲
語幽筍稚相攜杜秋娘云京江水清滑女手白如脂其閒杜
秋者不勞朱粉施老溷卽山鑄後庭千娥眉扶持玉笋醉與
唱金縷衣溷既白首畔秋亦紅淚滋吳江落日渡灞岸綠楊
垂聯裾見天子倩盼獨依依椒壁戀錦幕鏡匳盤蛟螭伍鬢
認新寵窈窕復融怡月上白璧門桂影涼參差金階露新重
閒捻紫簫吹莓苔夾城路南苑雁初飛紅粉羽林伏獨賜辟
邪旗歸來煮豹胎饜飫不能飽咸池昇日慶銅雀分香悲雷
陰後車遠事往落花時燕禱得皇子壯髮綠縷綉畫堂授傅
姆天人親捧持虎睛珠絡祿金盤犀鎮帷長楊射熊羆武帷

弄啞伊漸拋竹馬劇稍出舞雩奇嶄整冠佩侍宴坐瑤池
眉宇儼圖畫神香射朝暉一尺銅偶人江充知自欺王幽茹
土削秋放故鄉歸觚稜拂斗極回首尙遲遲四朝三十載似
夢復相疑過關識故吏吏髮已如絲卻喚吳江渡舟人那得
知歸來四鄰改茂苑草萋萋清血灑不盡仰天知問誰裁衣
一匹素夜借鄰人機我昨金陵過聞之爲吁歎自古皆一貫
變化安能推夏姬滅兩國逃作巫臣妻西子下姑蘇一舸逐
鴟夷織室魏豹俘作爲太平基誤置代籍中兩朝尊母儀光
武紹高祖本係生唐兒珊瑚破高齊作婢春黃糜蕭后去揚
州突厥爲閼氏女子固不定士林亦難期射鉤後呼父釣翁
王者師無國要孟子有人毀仲尼秦國逐客令柄歸丞相斯

安知魏齊首見斷箚中屍給喪蹙張輩廟廊冠戕危珥貂七
葉貴何防戎虜支蘇武卻生還鄧通終死飢主張旣難測翻
覆亦其宜地盡有何物天外復何之指何爲而促足何爲而
馳耳何爲而聽目何爲而窺己身不自曉此外何思維因傾
一尊酒題作杜秋詩愁來獨長詠聊可以自怡蕭后爲闕支
按唐書蕭后因破沒于竇建德突厥處羅可汗遣使招之建
德不敢留遂入于虜庭貞觀四年太宗滅突厥以禮迎后至
京師入虜庭則爲闕氏必矣寄小姪阿宜云小姪名阿宜未
得三尺長頭圓筋骨緊兩臉明且光去年學官人竹馬繞四
廊指揮羣兒輩意氣何堅剛去歲冬三日拜我立我旁祝爾
願爾貴仍日壽命長今年我江外今日生一陽憶爾不可見

祝爾傾一觴陽德化君子初生至微茫排陰出九城萬物隨
開張一似小兒學日就復月將殷勤不自己二十能文章我
家公相家劍佩常丁當府第開朱門長安城中央第中無一
物萬卷書滿牀家集二百編上下馳皇王多是撫州寫今來
五紀強可與爾再讀助爾爲賢良經書刮根本史書閱興亡
高摘屈宋豔濃薰班馬香李杜泛浩浩韓柳摩蒼蒼近者四
君子與古爭強梁願爾一祝後讀書日月忙一日讀十紙一
月讀一箱朝廷用文治大開官職場願爾出門去取官如驅
羊大明帝宮闕杜曲我池塘我若自潦倒看汝爭翱翔少年
行云官爲駿馬監職帥羽林兒兩綬藏不見落花何處期獵
敲白玉鐙怒袖紫金槌田竇長留醉蘇辛曲讓岐豪持出塞

後水高卷五
節笑別遠山眉捷報雲臺駕公卿拜壽卮七言云南朝四百
八十寺多少樓臺煙雨中又云蕭條市邑如魚尾歲晚干戈
識虎皮又云四海一家無一事將軍攜鏡泣霜毛又云九原
可作吾誰與師友瑯琊那曼容又云秋山春雨閒吟處倚徧
江南寺寺樓又云韓筆杜詩愁來讀似倩麻姑癢處爬又云
商女不知亡國恨隔江猶唱後庭花又云自說江湖不歸事
阻風中酒過年年又云公道世閒惟白髮貴人頭上不曾饒
斑竹簟云分明知是湘妃泣何忍將身臥淚痕又云無端有
寄閒消息背插金釵笑向人宮人冢云少年入內教歌舞不
識君王到死時別家云初歲嬌兒未識爺別爺不拜手吒叉
拊頭一別三千里何日迎門卻到家贈射獵云已落雙鵬血

尙新鳴鞭走馬又翻身憑君莫射南來雁恐有家書寄遠人
河湟云元載相公會借筇憲宗皇帝亦留神旋見衣冠就東
市忽遺弓劍不西巡牧羊驅馬雖戎服白髮丹心盡漢臣惟
有涼州歌舞曲流傳天下樂閒人絕句云玉子文楸一路饒
最宜檐雨竹蕭蕭得年七十更萬日與子期于局上銷故洛
城云錮黨豈能留漢鼎清談空解識胡兒千燒萬劫坤靈死
慘慘終年鳥雀悲九日齊山登高云江涵秋影雁初飛與客
攜壺上翠微塵世難逢開口笑菊花須插滿頭歸但將酩酊
酬佳節不用登臨恨落暉古往今來只如此牛山何必淚沾
衣橫江館云孫家兄弟晉龍驤馳騁功名業帝王至竟江山
誰是主苔磯空屬釣魚郎又云鏡中絲髮悲來易衣上塵痕

後村詩話新集卷五
拂卻難惆悵江湖釣竿手卻遮西日向長安牧之門戶貴盛
文章獨步一時其機鋒湊拍如德山棒臨濟喝少時不羈有
書記平安之謗晚年刺湖州猶有綠葉成陰子滿枝之恨若
未忘情于色界者晚節自誌其墓與臺卿自誌淵明自挽何
異非世之畏死但化者所可及也頃見考亭嘗以行草書齊
山九日之章乃知文公亦愛其才

後村詩話新集卷五

後村詩話新集卷六

宋劉克莊

白居易原上草云野火燒不盡春風吹又生清明云留觴和
冷粥出火煮新茶扇云引秋生手裏藏月入懷中太湖石云
峰駢仙掌出罅坼劍門開又云常恐國史上但記鳳與麟又
云昨日延英對今日崖州去又云所恨薄命身嫁遲別日迫
又云爲君一日恩誤妾百年身又云我無縮地術君非御風
仙又云行年三十九歲暮日斜時讀靈運詩云大必籠天海
細不遺草樹又云未得無生心白頭亦爲夭又云戀月夜同
宿愛山晴共看江州云野水多于地人煙半在船又云老色
日上面懽悰時去心今既不如昔後當不如今又云欲識來
往頻青蕪成白路又云笑勸新醅酒閒詠短李詩又云犬吠

村香鬧蟬鳴織婦忙又云成人男作非事鬼女爲巫又云吏徵漁戶稅人納火田租又云醉曾衝宰相驕不揖金吾又云散吏閒如客貧州冷似村又云憂方知酒聖貧始覺錢神又云雞鳴一覺睡不博早朝人又云戶大嫌甜酒才高笑小詩又云性靈閒似鶴顏狀古于松又云若不爲松喬卽須作皋夔又云微月初三夜新蟬第一聲又云病聞和藥氣渴聽碾茶聲又云小巢織巧婦新葉長慈姑又云玉柄鶴翎扇銀罍雲母漿又云秋風滿衫淚泉下故人多又云佛容爲弟子天許作閒人又云鬪閒僧尙鬧較瘦鶴爲肥又云不能留姪女曾免作衰翁又云婢能尋本草犬不吠醫人又云同時六學士五相一漁翁又云園葵烹佐飯林葉掃添薪又云有一燕

趙士言貌甚奇瑰日日酒家去脫衣典數杯問君何落拓云僕生草萊地寒命且薄君門乏良媒亦有同門生先升青雲梯貴賤交道絕朱門叩不開及歸種禾黍三歲旱爲災入山燒黃白一旦化爲灰處處去不得卻歸酒中來淵明云夷齊各一身窮餓未爲難先生有五男與之同飢寒又云三年典郡歸所得非金帛天竺石兩片華亭鶴一隻遂就無塵坊仍求有水宅豈獨爲身謀安吾鶴與石又云榮名與壯齒相避如朝暮時命始欲來年顏已先去又云泥壇方合矩鑄鼎圓中規鑪橐一以動瑞氣紅輝輝二物正訢合厥狀何怪奇綉繆夫婦體狎獵魚龍姿又云試問池臺主多爲將相官終身不曾到惟展宅圖看又云昔作少學士圖形入集賢今爲老

居士寫貌寄香山鶴毳變玄髮雞膚換朱顏前形與後貌相
去三十年七言云一叢暗淡將何比淺碧籠裙襯紫巾又云
藥圃茶園爲產業野麋林鶴是交游又云失寵故姬歸院夜
沒蕃老將上樓時照他幾許人腸斷玉兔銀蟾遠不知又云
曾犯龍鱗容不死欲騎鶴背覓長生又云每被老元偷格律
苦教短李伏歌行又云猶嫌小戶長先醒不得多時住醉鄉
又云洛陽女兒面似花河南大尹頭如雪又云琴書何必求
王粲與女猶勝與外人又云綺羅一八圍寶鼎組練三千夾將壇
又云爭得大裘長萬丈與君都蓋洛陽城又云大有高門鎖
空宅主人到老不曾歸又云病添莊舄吟聲苦貧欠韓康藥
債多又云柘枝紫袖教丸藥羯鼓蒼頭遣種蔬又云直應人

世無風月始是心中忘卻時又云冷落若爲留客住冰池霜
竹雪髯公又云漢容黃綺爲逋客堯放巢由作外臣哭劉夢
得云杯酒英雄君與操文章微婉我知正賢豪雖沒精靈在
應共微之地下遊又云螭蜺殺敵蚊巢上蠻觸交爭蝸角中
何似諸天觀下界一微塵裏鬪英雄又云秦磨利刀斬李斯
齊燒沸鼎烹酈其可憐黃綺入商洛閒臥白雲歌紫芝彼爲
道醞机上盡此作鸞皇天外飛去者逍遙來者死乃知禍福
非天爲又云禍福茫茫不可期大都早退似先知當君白首
同歸日是我青山獨往時願索素琴應不暇憶牽黃犬定難
追麒麟作脯龍爲醢何似泥中曳尾龜新豐折臂翁云新豐
老翁八十八頭鬢眉鬚皆似雪元孫扶向店前行左臂憑肩

後村詩集卷六
右臂折問翁臂折來幾年兼問致折何因緣翁云貫屬新豐
縣生逢聖代無征戰慣聽黎園歌管聲不識旗槍與弓箭無
何天寶大徵兵戶有三丁點一丁點得驅將何處去五月萬
里雲南行聞道雲南有瀘水柳花落時瘴煙起大軍徒涉水
如湯未過十人二三死村南村北哭聲哀兒別爺孃夫別妻
皆云前後征蠻者千萬人行無一回是時翁年二十四兵部
牒中有名字夜深不敢使人知偷將大石鎚折臂張弓簸旗
俱不堪從茲始免征雲南骨碎筋傷非不苦且圖揀退歸鄉
土臂折歸來六十年一肢雖廢一身全至今風雨陰寒夜直
到天明痛不眠痛不眠時終不悔且喜老身今獨在不然當
時瀘水頭身死魂飛骨不收應作雲南望鄉鬼萬人冢上哭

呦呦老人言君聽取不聞開元宰相宋開府不賞邊功防黷
武又不聞天寶宰相楊國忠欲求恩倖立邊功邊功未立生
人怨請問新豐折臂翁八駿圖云穆王八駿天馬駒後人愛
之寫爲圖日行萬里速如飛穆王獨乘何所之四荒八極蹋
欲徧三十二躡無歇時屬車軸折趁不及黃屋草生棄若遺
瑤池西赴王母宴七廟經年不輕薦碧臺南與盛姬遊明堂
不復朝諸侯白雲黃竹歌聲動一人荒樂萬人愁至今此物
世稱珍不知房星之精下爲怪賣炭翁云賣炭翁伐薪燒炭
南山中滿面塵灰煙火色兩鬢蒼蒼十指黑賣炭得錢何所
營身上衣裳口中食可憐身上衣正單心憂炭賤願天寒夜
來城外一尺雪燒駕炭車碾冰轍牛困人飢日已高市南門

外泥中歇翩翩兩騎來是誰黃衣使者白衫兒手把文書口
稱敕回車叱牛牽向北一車炭千餘斤宮使驅將惜不得半
匹紅紗一丈綾繫向牛頭充炭直官牛云官牛官牛駕新車
漚水岸邊搬載沙一石沙幾斤重朝載暮載將何用載向五
門官道西綠槐陰下鋪沙隄昨來新拜右丞相恐怕泥塗汗
馬蹏右丞相馬蹏蹋沙雖潔淨牛頸牽車欲流血右丞相但
能濟人治國調陰陽官牛頸穿亦無妨鹽商婦云鹽商婦多
金帛不事田農與蠶績南北東西不失家風水爲鄉船作宅
本是揚州小家女嫁得江西大商客綠鬟富去金釵多皓腕
肥來銀釧窄前呼蒼頭後呼婢問爾因何得如此婿作鹽商
十五年不屬州縣屬天子每年鹽利入官時少入官家多人

私官家利薄私家厚鹽鐵尙書遠不知何況江頭魚米賤紅
檜黃橙香稻飯飽食濃妝倚舵樓兩朵紅腮花欲綻鹽商婦
有幸嫁鹽商終朝美飯食終歲美衣裳好衣美食有來處亦
須慚媿桑弘羊桑弘羊死已久不獨漢時今亦有

元稹榴花五言云委作金鑪燄飄成玉砌霞憲宗輓歌云狼
星如要射猶有鼎湖弓又云俊鶻渡海食應龍昇天行又云
漸恐鯨鯢大波濤及九州又云新筍踴犀株落梅翻蝶翅又
云箏絃玉指調粉汗紅綃拭又云綵縷碧筠筠櫻香杭白玉團
又云佞存真妾婦諫死是男兒又云火魚江火合喚客谷神
應又云花態繁於綺閨情軟似絲又云勁芟鼈足斷精貫蝨
心穿又云望夫身化石爲伯首如蓬又云不知元不識俱作

路人行又云乘我牂犗馬蒙茸大如羝又云亭亭巧於削一
一大如棋槎枒矛戟合屹屹龍蛇動風朝竿籟過雨夜鬼神
恐蜘蛛云縈纏傷竹柏吞噬及蟲蛾爲送佳人喜珠櫛無奈
何小兒云亂騎殘爆竹爭唾小旋風罵雨愁妨走呵冰喜漸
融估客樂云估客無住著有身即行一解市頭語便無鄉
里情子本頻蕃息貨販日兼并求珠駕滄海采玉上荆衡北
買黨頭馬西禽吐蕃鸚越婢脂肉滑谿童眉眼明經游天下
徧卻到長安城先問十常侍次求百公卿侯家與王第點綴
無不精歸來始安坐富與王者勅大兒販材木巧識棟梁形
小兒販鹽鹵不入州縣征一身偃市利突若截海鯨七言云
他時定葬燒缸地賣與人家得酒盛又云初過寒食一百六

店食無煙宮樹綠又云四五年前作拾遺諫書不密丞相知
夢上天云乘時畏有他人上截斷龍胡斬鵬翼越州云星河
似向檐前落鼓角驚從地底迴我是玉皇香案吏謫居猶得
住蓬萊征夫遠云趙卒四十萬盡爲阬中鬼趙王未信趙母
言猶點新兵更填死阬中之鬼妻在營鬢麻戴經鶯雁鳴送
夫之婦猶行哭哭聲送死非送行夫遠征夫遠征遠征不必
戍長城出門便不知死生元白皆唐大詩人余觀古作者意
必以艱深文淺近必以尖新革塵腐二公獨不然世傳其有
賦詠元語多犯白固有偷格律之嘲白遇賦詠必使老嫗聞
而曉解者兩長慶集部帙數倍韓柳其間大篇如連昌宮詞
如琵琶行之類不可勝書姑錄其尤警策者於編元初與仇

士良爭驛劾嚴礪苛斂忤時相意賴李絳翟羣輩論救其詩
有佞存真妾婦諫死是男兒之句初節甚高及爲學士有上
眷中人爭與之交遂黨中人以阻裴度非復昔日之微之矣
其卒甫五十三故白哀詩云因知早貴兼才子不得多時在
世閒白天資近道多稱人之善然當君白首同歸日是我青
山獨往時之句不哀彼之冤而幸我之免文饒不存輩行不
分雅俗但欲以浙江觀察使臨蘇州刺史道眼觀之只堪一
笑集中數絕余嘗疑好事者爲之香山未必有此作也
李賀感諷云合浦無明珠龍舟無木奴足知造化力不給使
君須越婦未織作吳蠶始蠕蠕縣官騎馬來瘁色虬紫鬚懷
中一方板板上數行書不因使君怒焉得詣爾廬越婦拜縣

官桑芽今尙小會待春日晏絲車方擲掉越婦通言語小姑
具黃梁縣官蹋食去簿吏復登堂又云都門賈生墓青蠅久
斷絕寒食搖楊天憤景長肅殺皇漢十二帝惟帝稱聖哲一
夕信豎兒文明永淪歇秦王飲酒云酒酣喝月使倒行沙路
曲云帝前動笏移南山秋來云秋墳鬼唱鮑家詩恨血千年
土中碧夢天云黃塵清水三山下更變千年如走馬遙望齊
州九點煙一泓海水杯中瀉秦宮詩云飛窗複道傳頭飲十
夜銅盤膩燭黃又云斫桂燒金待晚煙白鹿清蘇夜半煮美
人梳頭歌云雙鸞開鏡秋水光解鬟臨鏡立象牀一編香絲
雲撒地玉釵落處無聲膩纖手卻盤老鴉色翠滑寶釵簪不
得又云背人不語向何處下階自折櫻桃花雁門太守行云

黑雲壓城城欲摧甲光向日金鱗開角聲滿天秋色裏塞上
胭脂凝夜紫半卷紅旗臨易水霜重鼓寒聲不起報君黃金
臺上意提攜玉龍爲君死金銅仙人辭漢歌云茂陵劉郎秋
風客夜聞馬嘶曉無迹畫闌桂樹懸秋香三十六宮土花碧
魏官牽車指千里東闕酸風射眸子空將漢月出宮門憶君
清淚如鉛水夜闌送客咸陽道天若有情天亦老攜盤獨出
月荒涼渭城已遠波聲小呂將軍歌云呂將軍騎赤兔獨攜
大膽出秦關金粟堆邊哭陵樹北方逆氣汙青天劍氣夜叫
將軍閑將軍振袖揮劍鏑玉闕朱城有門閣榼榼銀龜搖白
馬傅粉女郎火旗下恆山鐵騎清金槍遙聞籟中花箭香西
郊寒蓬葉如刺皇天親栽養神驥廐中高桁排蹇蹶飽食青

芻飲白水圓蒼低迷蓋張地九州人事皆如土苦篁調嘯引
云請說軒轅在時事伶倫采竹二十四伶倫采之自崑崙軒
轅詔遣中分作十二伶倫以之正音律軒轅以之調元氣當
時黃帝上天時二十三管咸相隨惟留一管人間吹無德不
能吹此管此管沈埋虞舜祠李憑箏篔引云吳絲蜀桐張高
秋空山凝雲頽不流江娥嘯竹素女愁李憑中國彈箏篔崑
山玉碎鳳皇叫芙蓉泣露香蘭笑十二門前融冷光二十三
絃動紫皇女媧鍊石補天處石破天驚逗秋雨夢入神仙教
神嫗老魚跳波瘦蛟舞吳質不眠倚桂樹露腳斜飛溼秋兔
長吉歌行新意險語自有蒼生以來所無樊川一序極騷人
墨客筆力盡古今文章變態非長吉不足以當之高軒過乃

其總角時所作若宿構者然其母曰是兒欲嘔出心乃已知
子莫若母豈非苦詠而得者歟唐雜記云賀性傲忽其詩爲
母中表投之溷中故傳於世者絕少悲夫使吾有中表如賀
當濯薔薇水薰玉蕤香方敢開卷此中表豈其鼻塞不知香
臭者歟

戴叔倫贈李山人唐云柳條將白髮相對共垂絲汝南別董
校書云擾擾倦行役相逢陳蔡間何爲百年內不見一人閒
對酒惜餘景間程愁亂山秋風萬里至又出穆陵關贈康老
人洽云一篇飛入九重門樂府喧喧聞至尊宮中美人皆唱
得七貴因云盡相識不脫敝裘輕綺羅長吟佳句掩笙歌賢
王貴主於我厚駿馬蒼頭如已有暗將心事隔風塵盡擲年

光逐杯酒青門幾度見春歸折柳尋花送落暉叔倫仕至容
管觀察使半山選其詩凡四十七首五七言絕句已入選今
摘出集中平淡可玩味者劉亮切事情者趙南塘題天台戴
式之詩稿云台嶺散仙人詩家小叔倫式之由此名重有石
屏集南塘爲選取若干首

楊巨源獻聖壽云鑪煙添柳重宮漏出花遲老將云功成封
寵將力盡到貧鄉聖恩洗雪鎮州寄獻裴相公云天借春光
洗綠林戰塵收盡見花陰好生本是君王德忍死何妨壯士
心曾賀截雲翻柵遠仍聞劔凍下營深井陘昨日雙旗入蕭
相無言淚溼襟此謂田布知魏兵必叛殺身以自明楊公勇去之節退之一序
萬古不朽內云國子司業楊公方以能詩訓後進按夔以九

德教胄子周以德行道藝造士未聞以能詩訓後進者唐人或以一聯擅終身之貴然楊公可敬初不在詩丞相愛惜不能留童子釣遊不忍忘可以爲人師矣世傳楊公苦吟常掉其頭至老雖未嘗吟而掉頭自若所作尤律熟然其閒忠憤悲慨如聖恩洗雪鎮州寄獻裴相之篇可補唐史之缺

皇甫冉張公洞五言云何時種桃核幾度看桑田寄僧云一人春山裏千峰不可尋長安路云結束趨平樂聯翩抵狹斜温湯云丞相金錢賜平陽玉輦過魯儒求一謁無路獨如何傷美人云專房獨見寵傾國衆皆聞宿嚴維宅送包七云歲儲無別墅寒服羨鄰機出塞云吹角出塞門前瞻卽胡地三軍盡回首皆灑望鄉淚轉念關山長行看風景異由來征戍

客各負輕生義故齊王贈承天皇帝挽歌云禮盛追崇日人知友悌恩舊居從代邸新隴入文園鴻寶仙書祕龍旂帝服尊蒼蒼松裏月萬古此高原送魏十六還蘇州云秋夜深深北送君陰蟲切切不堪聞歸舟明月毘陵道回首姑蘇是白雲

皇甫曾送人往荊州云帆影連三峽猿聲近四鄰送李中丞云關河三晉路賓從五原人兩皇甫詩昔嘗略評之補闕詩尤多御史所作絕少然亦多佳句

陸龜蒙五言云河洲藏晚弋籬落露寒春出戶手先筇見人頭未帽七言云終須揀選幽棲處老檜雙成便出門

皮日休旅舍除夜云挑燈猶故歲聽角已新年陪江西裴度

游襄州延慶寺云不著前驅驚野鳥惟將後乘載詩人襄州
春游云映柳認人多錯誤透花窺鳥最分明岑牟單絞何人
著莫道猖狂似禰衡過雲居院古福上人舊居云重到雲居
獨悄然隔窗窺影尙疑禪不逢野老來聽法猶見鄰僧爲引
泉龕上已生新石耳壁閒空帶舊茶煙南宗弟子時時到泣
把山花奠几筵皮陸皆唐季詩客陸隱於甫里皮咸通八年
登第二人素友善倡和尤多昔之和詩者和意而已惟皮陸
必和韻有累至百韻者皮有七愛詩爲房杜李西平盧鴻元
魯山李太白白居易七人而作以嵩山處士魯山令次三大
臣李翰林白少傅名位不輕列於處士縣令之下其高致卓
識如此

杜荀鶴春宮怨云風暖鳥聲碎日高花影重經賈島墓云山
根三尺墓人人數聯詩弔李翰林云誰移耒陽冢來此作吟
鄰感寓云海枯終見底人死不知心雪云江湖不見飛禽影
巖谷惟聞折竹聲擁袍公子莫言冷中有樵夫跣足行哭具
韜公云交朋來哭我來歌喜傍山家葬薛蘿四海十年人殺
盡似君埋少不埋多谿興云山雨谿風卷釣絲瓦甌蓬底獨
斟時醉來睡著無人喚流下前灘也不知題覺禪和云少具
修行得似師茅堂佛像亦隨時禪衣納後雲藏綾夏臘高來
雪印眉耕地戒侵連冢土伐薪教護帶巢枝有時間著經中
事卻趙山僧總不知荀鶴詩在羅隱方干之下半山選唐詩
只取四首其五言最多然失之容易七言差勝

李涉山中無奈何云無奈落葉何紛紛滿衰草疾來無氣力
擁戶不能埽欲訪雲外人都迷上山道又云無奈澗水何喧
喧夜鳴石疏林透斜月散亂金光滴欲訪澗底人路窮潭水
碧又云無奈牧童何放牛喫我竹隔林呼不應叫笑如生鹿
欲報田舍翁更深不歸屋遊鶴林寺云野寺尋春花已遲背
巖惟有兩三枝平明攜酒猶堪醉爲報春風且莫吹涉詩見
於半山詩選者三十餘首其絕句已別選古體三首又鶴林
一絕皆有意味存之以備一家

顧非熊送朴處士歸新羅云少年離本國今去已成翁客夢
孤舟裏鄉山積水東鼇沈崩巨岸龍鬪出遙空學得中華語
將歸誰與同非熊況之愛子況詩云老人喪愛子日暮泣成

血老人年七十不作多時別非熊亦有詩名今存者僅百餘
篇

朱慶餘上江州李使君云得在朝廷少還應諫諍多杭州送
蕭校書云別君猶有淚學道漫經年慶餘妝罷低聲問夫婿
畫眉深淺入時無絕句爲世所稱然他作皆不如此

韓翃寄武陵李少府云楚歌催晚醉蠻語入新詩翃寒食絕
句爲德宗嘉獎擢知制誥有與相同名者時相審之御批云
日暮漢宮傳臘燭輕煙散入五侯家與此韓翃唐人尤重德
宗詩有聞說德宗曾到此吟詩不見倚闌干之句又云曾唱
正元供奉曲又嘲宋濟爲惡詩唐諸帝中當以帝詩爲第一
意翃所作皆善今集中警句可摘出者殊寥寂簡短恐有散

佚者

嚴維酬劉員外云柳塘春水漫花鴨夕陽遲維嘗與皇甫冉
劉長卿唱和然前輩惟稱其柳塘花鴨一聯

曹松送方干云汲水疑山動揚帆覺岸行商山野叟云木弓
未得長離手猶與官家射麝香南海旅次云南國正當無雁
處故園誰道有書來松詩半山選十四篇擇其三聯於此

劉希夷代白頭翁云年年歲歲花相似歲歲年年人不同又
云此翁白頭真可憐伊昔紅顏美少年希夷雖則天時人然
格律已有天寶以後之風矣

盧象雜詩云家居五原上征戰是平生獨負山西勇誰當塞
上名死生遼海戰雨雪薊門行諸將封侯盡論功獨不成象

詩入半山選者十首姑摘出其一

鮑溶五言云豈惟親賓散鳥鼠移巢窠又云楚老幾代人種
田煬帝宮零落池臺勢高低禾黍中又云雪壯冰亦堅凍湖
如平地幽人毛褐煥笑就糟牀醉喚人空谷應開火寒爨至
拾薪煮秋粟看鼎書古字忽意南澗僧衣巾多雲氣露腳尋
逸人諮量意中事又云古風送微涼行旅動遠程憂人席不
煖殘月馬上明飄飄歧路間長見月初生重瘴曉色淺疏猿
寒颯清感此長歎息百年何所營駙馬宅云閒遣青琴飛小
雪自看碧玉破甘瓜又云襄陽太守沈碑意身後身前幾年
事湘江千歲未爲陵海底魚龍應識字甘泉碑果垂
鮑防雜感云漢家海內承平久萬國戎王皆稽首天馬常銜

首蓓花胡人歲獻葡萄酒五月荔枝初破顏朝離上郡夕函
關雁飛不到桂陽嶺馬走皆從林邑山甘泉御果垂仙閣日
暮無人香自落遠物皆重近皆輕雖雖有德不如鶴館閣諸
書經南豐序引者皆不刊之言鮑溶詩清約謹嚴達理者少
之評惟深於詩者知之世謂子固不能詩謬矣唐時有鮑防
者亦有詩名唐文粹載二鮑詩防稍開拓今錄其雜感篇於
此

司空圖山中云川明虹照雨樹密鳥衝人又云波煖冬生筍
松涼夏健人又云夜短猿悲滅風和鵲喜虛又云孤螢出荒
池落葉穿破屋雜言云烏飛飛兔蹶蹶朝來暮去催時節女
媧只解補青天不解煎膠黏日月唐自朱三跋扈以來黠者

陰贊問鼎之謀悖者明獻改物之說奉璽六臣皆喬木世臣
子孫於時開闢亂世挺然自立不踐二姓之庭惟司空表聖
韓致光二士而已致光大節爲香奩所累不若表聖賦詠多
雅人壯士之言舊有其集嘗摘數聯餘不能悉記

項斯送華陰隱者云世人空識面弟子莫知年欲別云歸期
無歲月客路有風濤華陰道者云養龍於淺水寄鶴在高枝
寄坐夏僧云多因束帶熱更憶雉頭涼贈道者云自說身輕
健今年數夢飛哭南流人云宮庫空收劍蠻僧共起墳知名
人尙少誰爲錄遺文日東病僧云雲水絕歸路來時風送船
不言身後事猶坐病中禪深壁藏鏡影空窗出艾煙已無鄉
土信起塔寺門前舊宮人七言云自出先皇玉殿中衣裳不

更染新紅宮釵折盡空垂鬢內扇穿多半滅風桃熟亦曾君
手賜酒闌猶候妾歌終如今還向城邊住御水東流意不通
斯詩在方干秦系之間少而工

儲光羲野田黃雀云啮啮野田雀不知軀體微窮左一頽舍
棗多桑葉稀無棗猶可食無桑何以衣蕭條空倉暮相引時
來歸邪路豈不捷渚田豈不肥水長路且迴側側無心違
崔國輔對酒吟云行行日將夕荒村古冢無人迹蒙籠荆棘
一鳥飛屢唱提壺沽酒喫古人不逢猶不足遺恨精靈傳此
曲寄言世上諸少年平生盡在杯中綠

楊衡哭李象云白鶴黃犬不將來寂寞空餘葬時路草死花
開年復年後人知是何人墓

李端贈空洽云同時獻賦人皆盡共壁題詩君獨在于武陵
過侯王故第云不知彈鋏客何處感新恩
劉商醉後口號云春草秋風老此身一瓢長醉任家貧醒來
還愛浮萍草漂寄官河不屬人

羊士諤酬蕭使君出妓夜宴云玉顏紅燭忽驚春微步凌波
拂暗塵自是當歌斂眉黛不應惆悵爲行人余選晚唐數家
詩既盡又取儲光羲崔國輔楊衡李端于武陵劉商羊士諤
七人一聯半句以附益之七人非晚唐體

右前後續新四集詩話共十四卷前後集各二卷六十
歲至七十歲閒所作續集四卷乃公告老歸後所作詩
近八十新集凡六卷專采唐詩之新警者

咸淳戊辰五月夏閒也時年已八十二矣

後村詩話新集卷六 知人皆盡共聖賢 詩話卷六 知人皆盡共聖賢 詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

詩話卷六 知人皆盡共聖賢

